

海國圖志

卷五至八



卷之四

志

音

圖

卷

敘東南洋

魏源曰志海國莫瑣于明史外國傳傳成于尤檢討侗
侗本乎明外史及王圻續通考大蔽有三一曰西洋與
南洋不分古里瑣里皆南洋近國而與荷蘭佛郎機同
卷意大里亞處大洋極西而與柯枝榜葛刺同卷甚謂
佛郎機近滿刺加何翹秦越同席其蔽一二曰島國與
岸國不分謂淳泥卽大泥則移島於岸謂亞齊卽大食
波斯則移岸於島謂柔佛卽佛國而東西竺島卽天竺
賓童龍卽舍衛則移西天於東洋至若婆羅閣婆大小

瓜哇影射互殺叩槃捫燭其蔽二三曰同島同岸數國不當分而分大泥彭亨柔佛滿刺加吉蘭丹皆暹羅南境屬國也婆羅浚泥瓜哇蘇祿文萊馬神皆一島所環處也止宜以毗連各屬國附於暹羅之傳以浚泥等統立一同島之傳餘自亞齊三佛齊小瓜哇錫蘭山等著名數大島國外類皆荒洲小嶼人不過數百家貢不過一再至無關沿革何與共球止宜統述一篇臚其名目乃各國各傳觸目迷離概稱在東南海中無疆里沿革可徵無市舶邊防可述其蔽三魏源又曰天地之氣其

至明而一變乎滄海之運隨地圍體其自西而東乎前
代無論大一統之世卽東晉南唐南宋齊梁偏隅割據
而航琛獻費之島服卉衣皮之貢史不絕書今無一登
于王會何爲乎紅夷東駛之舶遇岸爭岸遇洲據洲立
城埠設兵防凡南洋之要津已盡爲西洋之都會地氣
天時變則史例亦隨世而變志南洋實所以志西洋也
故今以呂宋荷蘭佛郎機英吉利布路亞五國綱紀南
洋其越南暹羅緬甸日本四國雖未并于洋寇亦以事
涉洋防者著于篇而朝鮮琉球洋防無涉者不及焉凡

海岸之國三海島之國六 其狀若胡蝶者各不列焉凡

其地城南數羅麻倫日本四圍雖未民于其地亦以律

律令以呂宋尚蘭刺浪難英吉麻番詔亞正個蘇麻倫

天州變順史國亦謂世而變志南新寶海以志西新州

地學究其地凡南洋之要皆身盡錄而詳之諸會此說

于王會可為平珠夷東地之無感氣等氣感附新州立

而地志之詳也夫地志之實矣不勝其多今既一

分其地而詳之則其地之詳矣夫地志之詳也夫地志之實矣不勝其多今既一

海國圖志目錄

東南洋海岸三國

卷五

越南故交趾

卷六

越南分國沿革林邑占城

卷七

暹羅故扶南

卷八

暹羅分國沿革 真臘東
捕塞

卷九

暹羅屬國今為英夷新嘉坡沿革 滿刺加
舊柔佛

卷十

緬甸 朱波
驃國

緬甸
驃國

卷九

暹羅分國沿革

緬甸驃國

海國圖志卷五

東南洋一

海岸之國

邵陽魏源輯

阿細亞洲總說

原本無今補輯

明艾儒略職方外紀亞細亞者天下一大州也人類肇

生之地聖賢首出之鄉其地西起那多理亞離福島六

十二度東至亞尼俺峽離福島一百八十度南起瓜音

哇在赤道南十二度北至冰海在赤道北七十二度所

容國土不啻百餘其大者首推中國此外曰韃而勒凡

牧部落皆是曰回回曰印弟亞即五印度曰莫臥爾小白頭曰百

兒西亞大白頭曰度爾格都魯機曰如德亞天方默德

並此州鉅邦也海中有鉅島曰則意蘭即錫蘭山曰蘇門答

刺曰瓜哇即葛雷巴曰渤泥此渤泥為島可證謂大泥即渤泥之謬曰呂

宋近臺曰馬路古坤輿圖說作木路各即美洛居也更有地中海諸島

亦屬此州界內中國則居其東南其北極出地之度南

起瓊州出地一十八度北至開平等處出地四十二度

從南涉北共得二十四度徑六千里東西大抵略同其

距大西洋路幾九萬開闢未始相通但海外傳聞尊稱

之為大知納近百年以來西船往來貿遷始闢其途兼

以麻算之士得歷中華廣聞見曠然遠覽其一統志所
詳者今不復述姑錄全洲大略于左

萬國地理全圖集曰四大地之中亞齊亞最廣大長二
萬四千里闊一萬二千三百里大地北極出地二度至
七十八度英國中線偏東自二十六至一百九十度南
及印度海有東京暹羅北耳西海隅北及北冰海東及
太平海與其海隅西連歐羅巴大地及地中海有微地
與亞非利加大地相連又及於紅海隅與印度海也在
此大地內南方之各國稱謂蕪來由列邦暹羅安南老

攪緬甸五印度北耳西亞刺百等國北有俄羅斯藩屬
國亦稱西百利東有中國及所屬滿州各地方日本羣
島並琉球西有西域列國與土耳其基藩屬中有蒙古族
各部地沙漠西藏東南邊則多羣島廣大且遠焉○亞
齊亞西方爲各人類始祖之本地道理術法與教門一
皆由亞齊亞出故亘古至今視爲重地

案亞齊亞卽亞細亞也一作阿

悉亞

越南一

安南國在暹羅之東北國都建于傳俵

此曰傳俵後又曰虎地蓋西京

順化港之異名也亦原有三國一曰廣南一曰干波底阿一曰

東京并有干波底阿所屬之臘阿士窮巴兩小國干波底阿

地接廣南當即明史之賓童龍與占城接壤者蓋廣南以東瀕海之小國千有七百七十國

年乾隆三十九年因廣南光中王冲幼被難與其遺臣遁于海

島遇佛蘭西教師阿特蘭彼此投契其懷義憤遂回佛

蘭西乞師適值佛蘭西國難未定閱數載始請得兵船

助其恢復于千有七百九十年乾隆五十五年滅仇復國案此志謂

安南光中王冲幼被篡事在乾隆三十九年借西洋兵復國事在乾隆五十五年既非明嘉靖中黎維潭復仇

滅莫之事又非嘉慶七年阮福映借暹羅兵復仇滅阮之事乾隆五十五年正阮光平篡黎氏黎氏投中國之

時更與此情事不合以前後考之此當專指廣南而言
 李侍堯奏粵民李阿集私越邊界至安南國之順化其
 地在安南王城西南遠隔重洋昔為阮姓竊據歷九世
 皆稱順化王與安南黎王世仇會順化王死有子二嫡
 幼而庶長先立其舅擅威福有同姓阮翁哀者以除奸
 立嫡為名募兵自稱西山王偪順化城二子皆出走李
 阿集以戰功封開國公阮翁哀思自立眾解不從李阿
 集入海遇順化二子舟劫奪其財攜家回內地為有司
 所執籍其家得調兵玉符上下各一左右鑿柄相應形
 圓而槌鐫小篆文云云案乾隆乙未為四十年與此志
 三十九年先後一歲情事正符而二子海中被劫即此
 志所謂遁入海島之事阮光平本名阮惠有兄阮岳即
 詩注所謂嫡幼庶長之事蓋阮光平幼時本遭難遯荒
 及長乃借兵恢復廣南又乘黎鄭內釁之際因並據安
 南耳中國惟知其晚年盜有安南之事不知其幼年亡
 失廣南之事惟御製詩注與此志相表裏而滇繫
 載師範安南紀略亦與此志互有出入光中王之為阮

光平無疑光中王既感歐羅巴之扶佐又慕歐羅巴之兵法

遂仿造兵船火器訓練國兵是以現有礮船三百艘大

兵船一號在阿細亞洲諸國罕與匹敵是以兼取安南

東京及干波底阿國并合三國而統一之此處始謂阮光平兼并安

南東都之事緬甸暹羅兵制皆由各頭目招募充伍器械皆

長鎗刀弩雖有火鎗皆西洋所廢棄之物購買修整不

堪適用惟安南軍器制度得之歐羅巴故在緬甸暹羅

兩國之上其水戰兵船長自八丈以至十丈不等而寬

僅八尺其製造之法取整油木一株截定長短尺寸先

用火燒出中槽，後用刀斧剝斷而成。沿河各城均備此，以待臨時一招而至。卽有五百號，每船掉槳五六十人，各帶長鎗短劍，別配火鎗兵三十人。船頭平直，安礮一門，自六棒至十二棒，重不等。遇敵將船橫排成列，羣唱戰歌，極力掉槳，頃刻逼近，隨卽死鬪。如敵人大船欲衝擊小船，則小船閃避又甚巧速。其王與貴人尋常所乘之船，雕飾鍍金，映水燿燦，士庶不敢僭也。安南兵船近日造作愈精愈巧，每船長十丈九尺，其材可作西洋兵船之中桅。緬甸暹羅兩國陸戰全恃堅銳木柵環繞重。

濠雖英吉利之兵馬亦有時可以拒之第兵欠紀律設
一破其柵卽未免潰亂奔竄安南軍制按歐羅巴兵法
訓練而成可云紀律之師計其兵數于千有八百年間
嘉慶六年約十有四萬今則不過五萬內有三萬在國扈衛
國王聞安南國王庫貯金錢計有七百十四萬員而銀
則不計其數也緬甸戶口約有五百萬暹羅戶口約百
有二十萬安南東京戶口五百有十萬四千臘阿士戶
口約八十有四萬蕪萊由戶口約十有九萬又中國人
在彼入籍約四十有四萬其官制章服文字大略都遵

中國為東方諸國所不及，眉公河為安南最鉅之河道。

亦發源雲南，南經巴爾門而注之海。眉公河似指富良江，其上游即雲南

之黎花江經安南入海由海口溯流而上，約二十餘日，巨船可揚

帆直駛三國土產木棉穀米油木花木白糖胡椒籐竹

膽黃檳榔燕窩海參象牙

原本

安南國東界海，南界海，西界暹羅，北界中國，廣西以虎

地為國都，領部落二十有一。原本部落名皆夷語，今刪之。其安南郡縣具詳前史。

重輯 原無今補

萬國地理全圖集曰：安南王據東京而取占城國之大

半南接暹羅達於南海北及中國東北及廣西西連老
撾暹國東達東京海隅及南海北極出自九度至二十
三度英國中線偏東自一百零三至一百零八度東北
隔富良江西交潦瀨江廣袤圓方二十九萬四千方里
東京望海平原如草場與占城地相似國內多山歸化
江路接西南界宣化江路接時麻道陀江路接金齒界
諒州路接左右兩界其國二十二郡六者爲占城故地
其外爲安南東京地其江自雲南廣西出者皆南流惟
東京之江東流其海之港甚多處處可泊國西都曰順

化城離海邊十八里沿江十二里建屋宇大半草廬罕
瓦屋其東京城在河濱距海三百里居民比順化更繁
爲貿易之埠與中國通商並不與他商經營東安居民
原來自中國開墾立業故其氣色相去不遠至占城之
土民面黑身矮與暹相似乾隆年間國王沒臣生異心
或結暹羅或結安南故爲安南侵據其地豐盛而民懶
惰海邊有湛巴族類風俗語音與安南異古時乘船冒
危遠商他國近日漸退安居山內服屬安南安南國崇
佛教拜偶像有奉天主教者王盡滅其教門而殺其師

然尚存四十餘萬信士。東京出金鐵，開廠每年掘銀二十餘萬。占城產米多，白糖、檳榔、肉荳蔻，唐船最多。占城之綠，賴江瀕海，捕魚爲生。安南人矮，身着長衫褲，以布纏首，衣裳黎黑色，惟尊貴服綢緞。眾民污穢，不洗衣，不浴體。風俗人清爽，滿面笑容，揚眉暢氣，安心聽命。但因連月徭役，小民貧苦無聊。王住殿，太乘榮威，其侍衛三萬丁，立內閣，置六部，中外百官，甚效中國之法。各省有其督撫、部院等大官，所讀之書，與中國相同。但其音懸絕。至于武備，國王請佛蘭西武官教列西國操演武藝。

是以所鑄之火礮所造之烏鎗不異佛蘭西其武官深
曉兵機所有兵船大勝中國之艦巡駛五印度南海各
國以廣見識其公使屢到外國隨便辦事遇有外國船
隻進港卽嚴行防範煩擾苛刻以塞外商之路中國所
來之大小船三百隻安南往新嘉坡每年三十有餘隻
但其水手係漢人王之兵船二三隻載雜貨亦赴其埠
貿易

聖武記安南所都曰東京卽唐交州都護治所而以廣
南順化二道爲西京卽古九真日南地中隔海口世爲

阮氏割據號廣南王兵強於安南初明嘉靖中安南爲
莫登庸所篡國王黎維諲走保清華順化四府至孫黎
維潭起兵破莫復國實其臣鄭氏阮氏之力世爲左右
輔政後右輔政鄭氏乘阮死孤幼出阮氏於順化使王
廣南而自專國事于是阮鄭世仇構兵至鄭棟益專柄
將篡國而忌廣南之強乃誘其土酋阮岳阮惠攻滅廣
南王于富春及鄭棟死阮惠又起廣南兵攻滅鄭氏于
是阮氏復專國盡取王都珍寶歸廣南治城池于富春
旋使其將阮任以兵數萬攻東京國王黎維祁遣使走

投訴中國時乾隆五十三年也。明年朝廷命兩廣總督孫士毅出師討阮惠。惠敗走。黎維祁復國。是冬阮惠復集廣南之眾。傾巢來襲。孫士毅軍潰走。還黎維祁復來投阮惠。亦改名阮光平。叩關謝罪乞降。言世守廣南。與安南敵國。非君臣。並請五十五年入覲祝

八旬萬

壽。詔封阮光平安南國王。五十七年卒。子阮光纘

襲封。初阮氏世王廣南。以順化海港爲門戶。與占城暹羅皆接壤。阮光平以兵篡國。國用虛耗。商船不至。乃遣烏艚船百餘。總兵官十二。以采辦軍餉爲名。多招中國

海盜使爲鄉導，入寇閩粵江浙。嘉慶初，各省奏擒海賊，屢有安南兵將及總兵封爵敕印。詔移咨安南，尚不謂國王預知也。暹羅旣與廣南積怨，會黎氏甥阮福映者，乞師暹羅，克復西都，并縛海賊莫扶觀等，獻諸中國。中國始知阮氏父子藪奸誨盜之罪。時嘉慶四年也。及七年，阮福映復破東京，盡有安南，備陳構兵始末，爲先世黎氏復仇。其舊封農耐，本古越裳氏地，今兼并安南，請以越南名國。詔封越南國王，蓋新阮篡黎十餘年，復滅于舊阮，今修職貢者，非復前日阮氏云。

英吉利夷情紀略

歙縣葉鍾進寄味山房雜記

嘉慶十一二年間有

大班喇弗者探知我屬國安南之東京地居海隅時有

內訌乘隙可取

時阮福映滅仇立國方新之故

遂親往孟甲刺約其兵

頭駕大舶十號直趨安南富良江海口先令其副兵頭

駕七艘入以討舊欠索馬頭為名安南聞之先飭漁艇

商船盡藏內港故入口數百里無阻直至東京下碇不

見一人及夜忽有小艇無數各載乾柴火藥四面圍至

急發大礮轟之小艇皆乘上風火發風烈七艘俱燼有

黑鬼善泅者遊水出報兵頭駭遁不敢再入

瀛環志略曰越南卽安南古之交阯秦以後唐以前皆隸版圖南界之林邑漢末卽自立爲國安南至五代時乃列外藩今并占城爲一國復兼眞臘北境安南故地南境占城眞臘故地稱曰廣南北界廣東廣西雲南三省西界暹羅東南面大海都城曰順化在富良江之南岸衣冠仍唐宋之制坐則席地貴人乃施短榻取士用策論詩賦設鄉會科士大夫皆好吟咏詩或劣不成句而人人喜爲之國分四十餘省一省所轄止數縣文武官名略同內地總督皆阮姓王之族也貴官坐堂皇或

解衣捫蝨其簡陋如此宴客設銅盤置蔬肉各少許無

醯醢以醢魚汁代之鴉片之禁甚嚴犯者立寘重典東

南臨海有都會曰祿奈或作祿賴一作龍奈一作農耐占城之故都也

南境臨海有都會曰東埔寨真臘之故都也閩廣商船

每歲往來貿易別國商船入港譏防甚嚴權稅亦重諸

國惡其煩苛故市舶罕有至者所產者番木沈楠諸香

鉛錫桂皮象牙燕窩魚翅之類其入貢由廣西之太

平府入關不由海道安南本中國地諸書言之綦詳故不多贅

俗傳紅毛船最畏安南不敢涉其境其人善於泗水

遇紅毛夾板，則遣數百人背竹筒，攜細縷，沒水釘於船底，從遠處登小舟牽曳之，俟其擱淺，乃火焚而取其貨，又或謂安南人造小舟曰軋船，能攻夾板船底，故紅毛畏之，以今考之，皆不甚確，蓋占城之北海，形如半月，海水趨灣，其勢甚急，海船或入灣內，無西風不能外出，紅毛夾板入溜擱淺，曾敗數舟，故至今歐羅巴人涉海，以望見廣南山爲厲禁，商船入安南內港，土人皆用小船繫繩牽引，乃慮其擱觸礁淺，藉爲鄉導，卽中國各港之引水船，反用之以碎敵船，理或

有之，惟沒水而釘船底，則事涉杳茫矣。至軋船之製，

曾有繪圖倣造者，施之海面，仍無異常船，耳食之談，

施之實事，往往鑿柄，正不獨此一事也。按鄭芝龍焚荷蘭船見臺

灣外紀時，荷蘭夾板擾閩浙，芝龍方受撫為裨將，奉

令往剿荷蘭船，堅炮猛乃募死士善泅者，以小船堆

柴薪，澆以油中，藏火藥前，置引線，船首施短鐵鍊，綴

利錐，死士一人持斧，坐船頭，數人從旁乘風潮急，掉

傍夷船，以斧釘錐於船舫，燃藥線投水，鳧回藥，燃火

發風，又猛烈，荷蘭夾板被焚，三艘餘遁去。云按芝龍

本海中劇盜，所養皆亡命，其權譎能得人死，力故出

奇制，勝理或有之，他書言火攻者，謂用千百木筏積

薪，順風潮縱之，或謂鎖千百小舟，積薪，艤港面圍之，

皆江河火攻舊說，施之夾板鑿柄，甚矣海面寬闊，夾

板相地散泊，相隔一、二、三、四里，木筏雖多，豈能塞

海，又豈能引鉞拾芥，使之相著，此自焚舟，何與彼事

地里備考曰安南國，又名交趾，在亞細亞州之南，北極出地八度四十五分，起至二十三度止，經線自東八十七度四十五分，起至一百零七度止，東南皆枕中國海，西連暹羅國，北接中國，南北相距三千七百里，東西相去一千五百里，地面積方約三十九萬三千七百五十里，烟戶三京三兆口，本國地勢山陵綿亘，平原坦闊，河則甚多，其至長者一賣岡河，一桑該河，一支來河，一多乃河，湖則甚鮮，其至大者一托湖，一勞湖，田土膴腴，穀果豐稔，草木茂盛，鳥獸充斥，土產金銀銅鐵錫絲茶漆。

靛蔗、繇花、檳榔、沙藤、肉桂、胡椒、象牙、藥材、木料等物。地氣溫和，主位相傳，所奉之教，儒釋不一。技藝精良，貿易昌盛。通國分爲五部：一唐沖，首府曰順化，乃西都也。建于順化河岸。一唐外，卽東都，首府曰給卓。一平順，首府曰占城。一嘉定，卽東埔寨，又名真臘，首府曰柴棍。一包當，首府曰保國。中部落四散，住居不屬統轄，名曰紛繁。茲不及贅。其通商衝繁之地：一名柴棍，一名代佛，一名罕山，一名給卓。

外國史略曰：亞悉亞，東南洋海岸各國，北連中國之雲

南廣西廣東南及暹羅海隅及南洋羣島東及安南東
都海隅西連榜甲拉海隅在亞西亞各國之至南其長
江曰迤拉瓦的江一名大金沙江由雲南流出逕緬甸
四千四百里入榜甲拉海隅水深廣可入大海船若小
三板船可及雲南界撤路音河一名溺江亦由雲南下
流直南入緬甸之馬他班海隅其北支內多暗沙南支
則水深三十里默南江一名沅江亦由雲南下流南向
入暹羅灌田最豐盛其江最深而出口處反淺默南君
河卽瀾滄江由雲南流入越南西都有漳江溪港有兩

條西方係緬甸國並英吉利藩屬地其東越南中間爲暹羅老掌等地南則爲蕪萊田族類

又曰越南國北極出地自八度三十分及二十三度偏東自一百零五度及一百零九度廣袤方圓六千七百里民在東都者千餘萬在廣南百有餘萬在占臘或在千賓百五十萬越南南連暹羅東及大海北與中國交界西連老掌其全國之地自南占臘地起如區粟鎮河僊南榮安江永清定祥蕃安邊和平順衙莊富安歸仁

和義廣南皆南地也其中央有廣德廣治廣平又安東

京各鎮。北方有清內、清外、興化、南上、南下、海東、京北、山西、高平、郎北、太原、宣光、廣安等鎮。其南方占臘之地，地低田肥，無山林，人繁盛，民不習勤。國君又不知教養，故府庫充而百姓貧乏。惟與中國交界之東都，居民蕃庶，勤勞能製各物。又花河邊之順化，田肥地茂，其內山多磽，低地出米、烟、檳榔、白饒、玉桂、皮胡椒、檀香、奇南香、粗茶葉等貨。港口便通商，面貌皆似中國。本漢人之苗裔也。其文學亦用中國字，讀中國書，法度規矩風俗皆與中國彷彿。士民伶俐，恆帶喜色，多巧思，衣尚黑，不好潔。

不浴身，男應徭役，女乏貞節，代男苦勞以養其家，庶民貧乏，惟僑寓之漢人免徭役，農力勞而收薄，商賈多漢人所運出者，檳榔、白糖、胡椒最多，通商極興旺，船由埔寨來者，載米、鹽等貨赴新埠頭貿易，國王亦調兵船，每年赴港，并赴旁甲拉東都所運賣者，係粗磁等貨，所造之烏鎗、大砲等火器尤妙，東都出胡絲，但不如中國之細，衣布、緞、紗皆粗，其上者必買自外國，乾隆三十八年，西都有兄弟三人，一為將軍，一為商賈，一為和尚，共驅國王，佛蘭西教主偕世子求援于暹羅國，併往

佛國求救，是時三奸已據其國，虐其民，其東征者不服。水土斃死甚眾，王駐伶仃島，於是佛國與本地義勇力驅奸徒，又攻擊東都，舊王復位，乃用佛官練兵鑄炮，又建戰船，如西洋之甲板，且築砲臺，自後武事日興，乘占臘國王內亂，與暹羅分據其地，直入祿賴，每年調兵船載餽貨，赴新埠等港貿易，所寓漢人亦駛各港口，在占臘載貨物，王自操全權，不與鄉紳會議，所納各稅約五百萬兩，其西都曰順化府，居民三萬，各江邊離海二里，北極出十六度四十五分，偏東一百零六度三十二分。

城周二里高三丈兵房周繞殿宇民居半以竹葵為之
大砲火器甚多皆佛蘭西造作初王亦許以海邊土地
給佛國居住後不踐約其佛官漸歸本地於是通商悉
罷且絕佛國嚴禁天主教然東都占臘廣南各地尚有
思奉教者東都京北鎮之港口居民十五萬與中國貿
易最興旺之港曰祿賴居民十三萬多暹羅小船及中
國大船又歸仁衙莊富安三處亦通商興旺之地占臘
古都今雖廢居民猶三萬有餘此安南通國情形之大
略也

武林郁永河裨海紀遊曰紅毛船用板兩層斲而不削製極堅厚中國人目爲夾板船其實整木爲之非板也其帆如蛛網盤旋八面受風無往不順較之中國帆檣不遇順風則左右箴折傾險迂艱者不翅天壤然巧於逆風者反拙於乘順風若與中國舟航並馳順風中彼反後矣故遇紅毛追襲卽當轉舵順風揚帆可以脫禍若仍行箴風鮮不敗者況彼船大如山小舟方畏其壓安能仰攻紅夷恃船大帆巧橫行海外輕視諸國所至侵奪顧兩敗于交趾交趾拒敵之法創造小舟名曰軋

船長僅三丈，舷出水面一尺，兩頭尖銳，彷彿端陽競渡龍舟，以二十四人操楫，飛行水面，欲退則反其棹，變尾爲首，進退惟意，儼然游龍。船中首尾各駕紅夷巨礮，附水施放，攻其船底，底破卽沈。雖有技巧，無所施設，於是大敗。至今紅毛船過廣南，見軋船出，卽膽落而去。中國東南半壁皆大海，日與西夷互市，軋船之製亦所宜講。余文儀《臺灣志》交畱巴國人本輕捷善鬪，紅毛製造鴉片，誘使之食，遂疲羸受制，其國竟爲所據。紅毛人自有食鴉片者，其法集眾紅毛人環視，繫其人於桅竿上，以

礮擊之故紅毛各國祇有造煙之人無一食煙之人又聞夷船由孟邁赴廣東必先經安南邊境初誘安南人食之安南覺其陰謀下令嚴禁犯者死無赦一國卒不受其害

澳門紀略曰昔西洋夷有以天主教行於安南者國人惑之國王盡拘其人立二幟于郊下令曰不從教者立赤幟下宥其罪如守教者立白幟下受誅竟無一人肯出教立赤幟下者王怒舉礮殲之至今不與西洋通市至則發大礮擊之西夷卒不敢往

魏源曰越南自漢唐明屢隸版圖列郡縣事燦前史惟其與西洋交構則皆在 本朝於中國洋防最密邇

雍正初紅夷兵船由順化港闖其西都而西都以水攻沈之嘉慶中復由富良海口闖其東都而東都以火攻燼之鷺鳥將擊必斂其形未聞禦大洋橫行之劇寇徒以海口礮臺為事者越南之禁鴉片與日本禁耶穌教同功與酒誥禁羣飲同律咄咄島邦尙能令止而政行

越南疆域附考

原無今補

皇清通考四裔門安南即交趾與滇粵接界由廣西至其國道有三從憑祥州入則經文淵脫朗諒

山溫州鬼門關保祿縣凡七日至安越縣之市橋
江由思明府入則過摩天嶺思陵祿平二州又過
車里江安博州耗軍洞鳳眼縣凡八日至市橋江
自龍州入則由平而隘七源州四日至文蘭平茄
社分二道一從文蘭過右隴縣北山經鬼門關渡
昌江經世安安勇二縣凡三日至市橋江一從平
茄縣西經武巖州司農縣凡四日至市橋江市橋
江在安越縣境昌江之南諸路總會處五十里至
慈山府嘉林縣渡富良江入交州由雲南至其國
道有二一由蒙自經蓮花灘入程瀾洞循洮江源
右岸過水尾文盤鎮安夏華清波諸州縣凡二十
七日至臨洮府又過山圍縣興化府白鶴縣凡十
日渡富良江一由河陽隘循洮江源左岸過平原
福安宣江端雄諸府州縣凡二十三日至富良江
然皆山徑欹側難行若循洮江右岸入乃大道也
若廣東海道自廉州五雷山發舟北風順利一二
日可抵交之海東府沿海岸行八日始至海東有
白籐安陽塗山多魚諸海口各有支港以達交州

此海道大略也國治在交州距京師萬有千百
 六十五里即唐都護治所郡縣分十三道道分十
 三承政司安邦海陽山南京北山西諒山太原明
 光興化清華又安順化廣南是也隸安邦者府一
 日海東舊即交州地隸海陽者府一仍日海陽舊
 即新安地隸山南者府十有一日上洪下洪天長
 廣東應天荆門新興長安涇仁昌平義興舊即諒
 江建昌奉化鎮蠻建平地隸京北者府四日北河
 慈山諒江順安舊即北江諒江地隸山西者府六
 日歸化三帶端雄安西臨洮沱江舊即交州嘉興
 歸化地隸諒山者府一仍日諒山舊諒山地隸太
 原者府三曰太原富平通化舊太原地隸明光者
 府一曰宣化舊宣化地隸興化者府三曰興化廣
 威天關舊即廣威州地隸清華者府四日紹天鎮
 甯蔡州河中舊清化地隸又安者府八日又安肇
 平思又奇華德先演州北平清都即又安演州地
 隸順化者府三曰廣化英都昇華舊即順化昇華
 地隸廣南者府三曰廣南茶麟五麻舊即又安地

其形勢東南一帶皆海，有望海城。漢伏波將軍馬援建國，境西界南掌，北界廣西，東北界廣東，沿邊皆有重巒深澗，林箐彌蔓。至大小落靠嶺，鬼門關、羅婆、羅翁、麓嶺，尤其國中要地。交州獨倚富良江，爲天險。江闊二三里，其水混濁，一自緬甸流入，由興化過嘉興府來，一自雲南流入，由興化府來，至交岡匯合諸小河，漸匯漸大。自西東下，經過交州北，向東南流入海。在國總屬州縣二百餘，東西相距一千七、百六十里，南北二千八百里。此安南全境也。國王黎氏，祖籍清華人，爲安南王。都清華，繼因交州爲厯代割據險要地，兼有通海之利。始遷都之國無城池，人煙輻輳，地勢平坦，一望皆田。村莊櫛比，人多地少，合境州縣不過具數而已。唐調露初，置安南都護府，始名安南。至德初，改鎮南。大厯間，復名安南。凡國王嗣位，遣陪臣來請命。欽命正副使往封，賜以鍍金銀印。文曰：安南國王。其國中文武官制略同中國。兵丁皆免丁銀徭役，按月給餉，兵分水陸，不分戰守，兵以象爲

重每象額兵二百五十名有正象奴一副象奴二其餘兵丁分執火器刀鎗行則前後序進戰則左右排列凡交界隘口及衝要郡縣皆撥象鎮守喪祭遵文公禮信尚風水官民不許卜葬山上惟許葬於田富貴者冢上蓋茅屋歲久即平惟國王與輔政鄭氏葬必卜地至於權幸勢要或有私卜敗則亦平矣交州有國學文廟各郡縣皆建學校俱如中國間有釋老夷獠雜居性輕悍役使貧弱倖掠不忌惟交愛二州倜儻好謀驩演二州淳秀好學交州惟國都及安邦承政司所屬地愛州屬清華承政司驩州演州屬安承政司云屋舍惟王府輔政宅及廟宇用瓦色紫黃餘皆茆屋國中農桑極盛荳蔴蔽野兼饒魚鹽之利金珠珊瑚瑠瑯石磬火齊丹砂諸貨若其中外離合國祚變遷自秦及明前史備載本朝順治十六年雲南平定安南國王黎維祺奉表貢康熙五年維禱繳呈故明王永歷所給敕印詔遣使封為安南國王乾隆五十二年黎維祁為阮光平所滅大兵恢復

其國旋仍爲阮光平所取，光平來降，並入朝。詔封阮光平安南國王，傳子阮光顯。嘉慶七年爲黎氏舊臣阮福映所滅，詔改封越南國，至今六年兩貢並進。

〔一〕統志曰：廣東欽州、廣西左江、雲南臨安、元江皆與交趾爲界，欽以東、海道與之對境，欽以西爲南甯府、南甯之東南，思明府所屬，思州、忠州上下石西諸州、太平府所屬，龍英、太平、安平上下凍諸州皆與接境。西龍州乃其所必由之路，而憑祥州則其要害也。鎮安府所屬有歸順及下雷洞，亦與接境。二峒迤西則雲南界矣。臨安之阿迷州左能塞等九長官司皆其近界。元江有水路通之，而蒙自縣則其所必由之路也。其道路在廣西則由太平府、憑祥州及憑祥州抵其諒山府，至其所稱東都者，可七日程。在廣東則自欽州西南一日至其永安州，由玉山等處至其東都，可五日程。在雲南則由臨安府經蒙自縣、河底之蓮花灘，至其東都，可四五日程。此中國與交南邊境之大略也。

粵中見聞曰安南地東西相距一千七百六十里
南北相距二千八百里其爲府十七爲州四十七
爲縣一百五十七歲入司農一千三百六十餘萬
舉滇黔閩廣之賦不足以當之俗稱富庶明代棄
若弁髦嘉靖中黎莫變生廷議征討吾粵先哲霍
文敏議遣大司馬按兵境上詔諭交人以郡歸者
授之郡以州歸者授之州使其自爲守若廣西之
土官然可不血刃而定湛文簡權論亦如此而竟
不行誠可惜也由廣東入交趾海道自欽州南大
海揚帆一日至西南岸卽交趾潮陽鎮又自廉州
冠山前海發舟北風順利一二日可抵交趾海東
府若沿海岸而行烏雷嶺一日至白龍尾又二日
至玉山門又一日至萬甯州又二日至廟山又三
日可抵交趾海東府自欽州天涯驛經貓兒港由
萬甯州抵交趾國城陸路止二百九十一里又欽
州城下登舟兩日至漏淪自漏淪至防城陸路一
十五里防城有廉州府同知龍門協左營一守備
駐劄防城水路三日可至交趾萬甯州管下之江

坪防城水路兩日可至欽州管下如昔司巡檢所
轄之東興街有欽州州判與龍門協左營一千總
駐劄東興街至江坪陸路止五十里隔一小河耳
江坪各省商賈輻湊多有婚娶安居者計欽州東
興街至安南國城海道約六七日陸路約一十一
二日也由廣西入交趾分三路自憑祥州入者出
鎮南關一日至文淵州自思明府入邱溫者過摩
天嶺一日至思陵州自龍州入者一日至平而隘
由雲南入交趾元時始開兩路自蒙自縣入經蓮
花灘以抵交趾之石瀧自河陽隘入循洮江左岸
十日至交趾平原皆山徑難行明英國公張輔發
兵憑祥黔國公沐晟發兵蒙自不隨馬伏波故道
夾攻取勝此奇兵也

其有六月
夾更類

十日全交據平浪山嶺嶽谷間夾更公靈辭

南人交匯文傳故開兩湖自來時

隨南湖一日至文而後自思

與世至交前

上平各

社代

海國圖志卷六

東南洋二海岸之國

邵陽魏源輯

越南分國二

越南西都即廣南國也漢為日南九真郡晉以後曰林邑宋以後曰占城國朝曰廣南今並入越南為西都。原無今補

東西洋考安南分十二承政司其實一承政不能及中

國一府或自舊縣升為府如慈山泄仁之類或承政祇

管一府如宋邦諒江之類舊名多更改割裂船人稱西

京者即其故都其王居曰日南殿清化港即舊清化府

也是漢九真郡治之地隋唐為愛州在交趾為西京今

爲清華承政司順化港卽舊順化府也今爲順化承政司廣南港卽舊乂安府也漢爲日南隋唐爲驩州今爲廣南承政司廣南有太傅阮某者國相鄭松之舅也松旣執國政阮不能平擁兵出據於此威行諸郡某卒其子始修貢東京新州港卽舊新安府也今爲海陽承政司提夷港亦交趾屬縣風俗大約與東京相類尙有汝南承政京北承政山西承政諒山承政太原承政明光承政興化承政乂安承政皆非瀕海之地賈船所不到故不詳之中國賈船至其海口司關者以幣報酋船主

見酋行四拜禮獻方物酋爲商人設食乃給木牌於麀
舍聽民貿易酋所須者輦而去徐給官價以償廣南酋
號令諸夷埒於東京新州提夷皆屬焉凡買船在新州
提夷者必走數日程詣廣南入貢廣南酋亦送給木牌
民過木牌必致敬乃行

皇清通考四裔門廣南國爲古南交地王本中國人阮
姓歷代以來未通職貢其地東接安南西鄰占城南濱
海東北至緬甸西北距暹羅境有大山海水環之望如
半月名曰廣南灣人善泅紅毛國人夾板船最大風帆

不利，漂入廣南灣者，國人卽遣小舟數百，雲集其處，人負一竹筒，納長縷，沒水而釘縷於船下，還棹小舟，遠曳以行，使其閣淺，始奪其貨而焚其舟，故紅毛人以不見廣南山爲幸。他國商船入廣南者，稅物加倍。康熙八年，廣東都司劉世虎等遇風漂泊其地，廣南國王遣臣趙文炳送歸，并帶貨物。船隻來粵，部議趙文炳等雖奉廣南印文遣來，實係中國之人，或留或遣，請旨定奪。其帶來之物，現奉海禁，不便貿易，應入戶部，得旨。廣南國王送劉世虎等同粵，殊爲可嘉，著給以照驗，遣

歸廣南船貨不必入官仍給來使凡往來商船由廈門至廣南者先過安南界歷七洲洋向廣南外之占畢羅山卽入其境國無城郭周栽蒻竹以自固云

源按廣南卽阮光平先世所封地本安南附庸以地險兵強自爲一國近則并歸安南矣 皇清

通考係黎氏未滅已前所修故以廣南別爲一國

陳倫炯海國聞見錄南洋諸國以中國偏東形勢用針取向俱在丁未之間合天地包大西洋按二十四盤分之卽在巽已矣就安南接聯中國而言海接廉州山繞

西北而環南，直至占城，形似半月，名曰廣南灣。秦象郡、漢交趾、唐交州、宋安南、陸接兩粵、雲南，風土人物，史典備載。後以涪化新州廣義占城之地，統名廣南。因舅甥委守涪化，隨據馬龍角礮臺，北隔一水，與交趾礮臺爲界。自涪化而南至占城，爲廣南國。其王阮姓，亦稱廣南王。古日南郡地也。以交趾爲東京，廣南爲西京，而西京強於交趾。南轄祿賴、東埔寨、豈大嗎。西南鄰暹羅，西北接緬甸。栽蒴竹爲城，人善沒。紅毛甲板船，風水不順，溜入廣南灣內者，國遣小舟數百人，背竹筒，攜細縷，沒水。

密釘細縷於甲板船底遠漿牽曳船以淺閣火焚而取其輜重今經毛甲板以不見廣南山爲戒見則主駕舟者曰夥長國有常刑廈門至廣南由南澳見廣之魯萬山瓊之大洲頭過七洲洋取廣南外之占畢羅山而至廣南計水程七十二更廈門至交趾由七州西繞北而進交趾水程七十四更七洲洋在瓊島萬州之東南凡往南洋者必經之所西洋甲板有混天儀量天尺較日所出刻量時辰離水分度卽知爲某處中國洋艘無此儀器止用羅經刻漏沙以風大小順逆較更數每更約

水程六十里，風大而順，則倍累之；潮頂風逆，則減退之。雖知某處，不如西洋船之確，必見某處遠山，分別上下山形，用繩駝探水深淺，驗其沙泥，一一配合，方為準確。至七州大洋大洲頭而外，浩浩蕩蕩，無山形標識，風極順利，對針亦必六七日始能渡過，而見廣南占畢羅外洋之外羅山，方有準繩。偏東則犯萬里長沙，千里石塘，偏西則恐溜入廣南灣，無西風不能外出。且商船非本赴廣南者，入其境以為天賜，稅物加倍，均分猶若不足。比於紅毛人物兩空，尚存中國大體，所謂差毫釐失千

里也。七州洋中有種神鳥，狀似海岸而小，喙尖而紅，腳短而綠，尾帶一箭，長二尺許，名曰箭鳥。船到洋中，飛來引導，人呼是則飛而去，間在疑似，再呼細看，決疑仍飛而來，獻紙謝神，則翔翔不知其所之。相傳王三寶下西洋，呼鳥插箭命在洋中爲記。

魏源曰：廣南爲林邑，占城舊壤。明史尙與安南鄰國。皇清通考，修於乾隆四十五年，亦以廣南安南並列。故阮光平自理之疏，亦謂世守廣南，與安南敵國，而廣南常扼安南之項背。西都常制東都之死命，則地利形勢然。

哉莫氏篡黎而清華順化四府據于黎氏則卒覆于黎
黎氏恢復而廣南順化割于阮氏則卒覆于阮阮氏據
國而農耐迫廣南肘腋則卒借暹助以并東都舊志謂
阮氏恢復廣南借佛郎機之力考海國聞見錄作于雍
正初前乎阮氏數十載已言廣南水戰爲紅毛船所畏
何爲反借助于紅毛且此志中語及廣南戰艦戒心動
色情見乎詞固不得不虛稱歐羅巴援救之功以揜英
吉利創敗之辱彼謂西洋水犀戈船無敵海內外者抑
知五行迭相克陰陽迭相勝天下有不可制之物耶廣

南瀕海之順化港口，卽古賓童龍國，爲占城東盡境。自明王圻謬指爲舍衛國，明史因之，悲夫悲夫。籌防邊，問兔園語，廟謨恃郢書，用陳湯，不如石與匡。

越南分國沿革上

廣南之地，晉唐五代，曰林邑。○原無今補。

晉書林邑國，本漢時之象林縣，其南則馬援鑄柱之處也。去南海三千里，後漢末，曹區殺令，自立爲王。其後王無嗣，外甥范熊代立，其俗皆開地戶，以向日。至於居止，東西無定，果於戰鬪，便山習水，不嫺平地。四時暄煖，無霜雪，人皆裸跣，以黑色爲美，貴女賤男，同姓爲婚，婦先聘，婿其王服天冠，被纓絡，每聽政，子弟侍臣，皆不得近。武帝太康中，始來貢獻。咸康二年，范逸死，奴文篡位。文曰：南西卷縣夷帥范椎奴也。嘗牧牛澗中，獲二鯉魚，化成鐵，用以爲刀，斫石嶂，石卽瓦，解文知其神，乃懷之。隨商賈往來，見上國制度，至林邑遂教逸作宮室城邑。

及器械逸甚愛信之使爲將文乃譖逸諸子或徙或奔
及逸死無嗣文遂自立爲王乃攻大岐界小岐界式僕
徐狼屈都乾魯扶單等諸國并之有眾四五萬遣使入
貢其書皆胡字 永和三年攻陷日南害太守夏侯覽
殺五六千人餘奔九真以覽尸祭天鏹平西卷縣城遂
據日南告交州刺史朱蕃求以日南北鄙橫山爲界初
徼外諸國嘗齎寶物自海路來貿貨賄而交州刺史日
南太守多貪利侵侮十折二三至韓戢估較大半由是
諸國恚憤及覽至郡又耽荒於酒政教愈亂故被破滅
旣而文還林邑是歲朱蕃使督護劉雄戍於日南文復
攻陷之四年文又襲九真害士庶十八九五年征西督
護滕峻率交廣之兵伐文於盧容爲文所敗退次九真
其年文死子佛嗣升平中廣州刺史
史滕含伐之佛懼請降與盟而還
梁書林邑國者本漢日南郡象林縣古越裳之界也伏
波將軍馬援開漢南境置此縣其地縱廣可六百里城
去海百二十里去日南界四百餘里北接九真郡其南
界水步道二百餘里有西國夷亦稱王馬援植兩銅柱

表漢界處也其國有金山石皆赤色又出瑇瑁貝齒吉貝沈木香晉世范文爲王穆帝永和三年夏侯覽爲日南太守侵刻尤甚林邑先無田土貪日南地肥沃常欲略有之至是因民之怨遂舉兵襲日南殺覽以其屍祭天留日南三年乃還林邑交州刺史朱蕃遣督護劉雄戊日南文復屠滅之進寇九德郡殘害吏民遣使告蕃願以日南西北境橫山爲界蕃不許文歸林邑尋復屯日南五年征西將軍桓溫遣督護滕峻九真太守灌遂帥交廣州兵討之其王范佛嬰城固守遂令峻盛兵於前遂帥勁卒七百人自後踰壘而入佛眾驚潰奔走遂追至林邑佛乃請降安帝隆安三年佛孫順達復寇日南九德皆執其太守交趾太守杜瑗遣兵擊破之即以瑗爲刺史義熙三年順達復寇日南九年寇九真瑗皆遣兵破走之自瑗卒後林邑無歲不寇日南九真諸郡殺傷甚多交州遂致虛弱順達死子敵真立其弟敵鎧攜母出奔敵真追恨不能容其母弟捨國而之天竺禪位于其甥其甥又爲國相藏麟子攻殺而立文敵文敵又爲扶南王子當根純所殺大臣范諸農平其亂而自立

為王

宋書高祖永初二年林邑王范楊邁遣使貢獻即加除受文帝永嘉七年遣使自陳與交州不睦求蒙恕宥八年又遣樓船百餘寇九德入四會浦口交州刺史阮彌之遣隊主相道生將三千人赴討攻區粟城不克引還林邑欲伐交州借兵於扶南王扶南不從十年楊邁遣使上表獻方物求領交州詔答以道遠不許太祖元嘉初侵暴日南九德諸郡二十三年使龍驤將軍交州刺史檀和之伐之遣太尉府振武將軍宗慤受和之節度見討遣使上表願還所略日南民戶奉獻國珍二月軍至朱梧戍楊邁外言歸欵猜防愈嚴景憲等乃進軍向區粟城楊邁遣水步軍徑至景憲破其外救盡銳攻城五月尅之斬其帥首獲金銀雜物不可勝計乘勝追討即林邑楊邁父子挺身奔逃所獲珍異皆未名之寶又銷其金人得黃金數十萬斤又宗慤傳元嘉二十二年伐林邑慤自奮請行除振武將軍為安西參軍蕭景憲軍副隨交州刺史檀和之圍區粟城林邑遣將范毘

沙達來救和之遣偏軍拒之為賊所敗又遣慤慤乃分軍為數道偃旗潛進討破之拔區粟入象浦林邑王范楊邁傾國來拒以具裝被象前後無際士卒不能當慤曰吾聞獅子威服百獸乃製其形與象相禦象果驚奔眾因潰散遂克林邑收其異寶雜物不可勝計

南齊書南夷林邑國在交州南海行三千里北連九德秦時故林邑縣也漢末稱王晉太康五年始貢獻晉建興中日南夷帥范稚奴文數商賈見上國制度教林邑王范逸起城池樓殿王服天冠如佛冠身被香纓絡國人凶悍習山川善鬪吹海蠡為角人皆裸露四時暄暖無霜雪貴女賤男人色以黑為美南方諸國皆然區粟城建八尺表日影度南八寸自林邑西南三千餘里至

扶南

水經注溫水篇交州外城記曰從日南郡南去到林邑國四百餘里林邑記曰其城治二水之間三方際山南北瞰水東西澗浦流湊城下城西折十角周圍六里城開十三門凡宮殿南向屋宇二千一百餘間市居周繞阻峭地險故林邑兵器戰具悉在區粟多城壘自林邑

王范胡達始秦餘徙民染同夷化日南舊風變易俱盡
巢棲樹宿負郭接山榛棘蒲薄騰林拂雲幽煙冥緬非
生人所安區粟城建八尺表日影度南八寸自此影以
南在日之南故以名郡望北辰星落在天際日在北故
開北戶以向日此其大較也日南張重舉討入洛正曰
大會明帝問日南郡北向視日邪重曰今郡有雲中金
城者不必皆有其實曰亦俱出于東耳至于風氣暄暖
日影仰當官民居止隨情面向東西南北迴背無定人
性凶悍果于戰鬪便山習水不嫻平地古人云五嶺者
天地以隔內外况綿途于海表顧九嶺而彌邈非復行
路之遙阻信幽荒之冥域者矣建元二年林邑王范文
攻日南九真九德百姓奔逃千里無煙乃還林邑林邑
西去廣州千五百里城西南角高山長嶺連接天鄣
嶺北接澗大源淮水出邠邠遠界三重長洲隱山遶西
衛山迴東其嶺南開源小源淮水出松根界上山壑流
隱山繞南曲街迴東合淮流以注典冲其城西南際山
東北瞰水重塹流浦周繞城下東南塹外因傍薄城東
西橫長南北縱狹北邊兩端迴折曲入城周圍八里飛

觀鴟尾，迎風拂雲，緣山瞰水，騫翥鬼竄，但制造壯拙，稽古夷俗，城開四門，東爲前門，當兩淮渚濱，於曲路有古碑，夷書銘讚，前王胡達之德，西門當兩重塹，北迴上山，西卽淮流也，南門度兩重塹，對溫公壘，升平二年，交州刺史溫放之，殺交阯太守杜寶，別駕阮朗，遂征林邑，水陸累戰，佛保城自守，重求請服，聽之，今林邑東城南五里有溫公二壘，是也，北門濱淮，路斷不通，城內小城，周圍三百二十步，合堂瓦殿，南壁不開，兩頭長屋，脊出南，北南擬背日，西區城內石山，順淮面陽，開東向殿，飛檐鴟尾，青櫺丹堦，棖題桷椽，多諸古法，閣殿上柱，高城丈餘，五牛屎爲塗牆壁，青光迴度，曲掖綺牖，紫窗椒房，嬪媵無別宮，觀路寢永巷，共在殿上，臨踞東軒，逕與下語，子弟臣侍，皆不得上屋，有五十餘區，連薨接棟，檐宇如承，神祠鬼塔，小大入廟，層臺重榭，狀似佛刹，郭無市里，邑寡人居，海岸蕭條，非生民所處，而首渠以永安，養國十世，豈久存哉。

隋書林邑之先，因漢末交趾女子徵側之亂，內縣功曹子區連殺縣令，自號爲王無子，其甥范熊代立，死，子逸

立日南人范文因亂爲逸僕隸遂教之築宮室造器械
逸甚信任使文將兵極得眾心文因問其子弟或奔或
徙及逸死國無嗣文自立爲王其後范佛爲晉揚威將
軍戴桓所破宋交州刺史檀和之將兵擊之深入其境
至梁陳亦通使往來其國延袤數千里土多香木金寶
物產大抵與交阻同以甄爲城蜃灰塗之東向戶王戴
金花冠形如章甫衣朝霞布珠璣瓔珞足躡革屨時復
錦袍良家子侍衛者二百許人皆執金裝刀有弓箭矛
槊以竹爲弩傳毒於矢樂有琴笛琵琶五絃頗與中國
同每擊鼓以警眾吹蠡以卽戎其人深目高鼻髮拳色
黑俗皆徒跣以幅布纏身冬月衣袍婦人椎髻施柳葉
席人死以菴盛屍輿至水次積薪焚之收其餘骨王則
內金罌中沈之於海口庶人以瓦送之於江男女皆截
髮隨喪至水次盡哀而止每七日然香散花復哭盡哀
盡七七而罷至百日三年亦如之人皆奉佛文字同於
天竺高祖旣平陳乃遣使獻方物其後朝貢遂絕時天
下無事羣臣言林邑多奇寶者仁壽末上遣大將軍劉
方爲驩州道行軍總管將步騎萬餘及犯罪者數千人

擊之其王梵志率其徒乘巨象而戰方軍不利方於是
多掘小坑草覆其上因以兵挑之梵志悉眾而陣方與
戰僞北梵志逐之至坑所其眾多陷轉相驚駭軍遂亂
方縱兵擊破之頻戰輒敗遂棄城而走方入其都獲其
廟主十八枚皆鑄金爲之蓋其有國十八葉矣方班師
梵志復其故地遣使謝罪於是朝貢不絕
新唐書南蠻傳王本林邑也一日占不勞亦曰占婆直
交州南海行三千里地東西三百里而巖南北千里西
距真臘霧溫山南抵奔浪陀州其南大浦有五銅柱山
形若倚蓋西重巖東涯海漢馬援所植也其地冬溫多
霧雨產琥魄猩猩獸結遼鳥以二月爲歲首稻歲再熟
取檳榔瀋爲酒椰葉爲席俗凶悍果戰鬥以麝塗身日
再塗再澡拜謁則合爪頓顙有文字喜浮屠道治金銀
像大或十圍王所居曰占城別居曰齊國曰蓬皮勢王
衣白氍古貝斜絡臂飾金珮爲纓鬖髮戴金華冠如章
甫妻服朝霞古貝短裙冠纓如王王衛兵五千戰乘象
藤爲鏡竹爲弓矢率象千馬四百分前後不設刑有罪
者使象踐之或送不勞山俾自死隋仁壽中遣將軍劉

芳伐之其王范梵志挺走以其地為三郡置守令道阻不得通梵志衰遣眾別建國邑武德中再遣使獻方物高祖為設九部樂饗之貞觀時王頭黎獻馴象鏐鎖五色帶朝霞布火樹與婆利羅刹二國使者偕來林邑其言不恭羣臣請問罪赦不問又獻五色鸚鵡鸚鵡斷訴寒有詔還之元和初不朝獻安南都護張舟執其僞驩愛州都統斬三萬級虜王子五十九獲戰象舫鎧

越南分國沿革下

廣南之地宋以後曰占城。原無今補。

宋史占城國在中國之西南東至海西至雲南南至真臘國北至驩州界汎海南去三佛齊五日程陸行至賓陀羅國一月程其國隸占城焉東至麻逸國二日程蒲端國七日程北至廣州使風半月程東北至兩浙一月程西北至交州兩日程陸行半月程其地東西七百里南北三千里南日施備州西日上源州北日烏里州所統大小州三十八不盈三萬家其國無城郭有百餘村每村落戶三五百或至七百亦有縣鎮之名民獲犀象

皆輸於王其風俗衣服與大食國相類互市無緡錢止
用金銀較量錙銖或吉貝錦定博易之直樂器有胡琴
笛鼓大鼓樂部亦列舞人其王腦後鬢髻散垂披吉貝
衣戴金花冠七寶裝纓絡爲飾脛股皆露躡革履無襪
婦人服及拜揖與男子同王每日午坐官屬謁見膜拜
或出遊看象採獵觀魚皆數日方還近則乘軟布兜遠
則乘象一人持檳榔盤前導從者十餘輩各執弓箭刀
鎗手牌等曰或一再出其王或以兄爲副王或以弟爲
次王設高官凡八員東西南北各二分治其事無俸祿
令其所管土俗資給之勝兵萬餘人定十一月十五日
爲冬至十二月十五日城外縛木爲塔王及人民以衣
物香藥置塔上焚以祭天人有疾病旋采生藥服食地
不產茶止飲椰子酒兼食檳榔有重罪令象踏之犯奸
者男女共入牛以贖罪負國王物者以繩拘於荒塘物
充而後出之其國前代罕與中國通周顯德中遣其臣
貢方物有雲龍形通犀帶菩薩石又有薔薇水灑衣經
歲香不歇猛火油得水愈熾皆貯以琉璃瓶建隆二年
來貢表章書於貝多葉以香木函盛之太平興國六年

交州黎桓上言欲以占城俘九十三人獻於京師太宗遣還占城詔諭其王淳化元年新王楊陁排自稱新坐佛逝國遣使貢馴犀方物表訴爲交州所攻國中人民財寶皆爲所略上賜黎桓詔令各守境嘉祐七年正月廣西安撫經略司言占城素不習兵與交阻鄰常苦侵軼而占城復近修武備以抗交阻將繇廣東路入貢京師望撫以恩信七年交州李乾德言其王領兵三千人并妻子來降以正月至本道九年復遣使來言其國自海道抵真臘一月程西北抵交州四十口皆山路所治聚落一百五大略如州縣王著大食錦或川法錦大衫七條金纓絡戴七寶裝成金冠躡紅皮履出則從者五百人十婦人執金捍合貯檳榔導以樂王師討交趾以其素仇詔使乘機協力除蕩其國選兵七千扼賊要路其王以木葉書回牒詔使上之然亦不能成功後兩國同入貢占城使者乞避交人詔遇朔日朝文德殿分東西立大宴則東西坐七年閩人有抵占城者其國方與真臘戰皆乘大象勝負不能決閩人教其王習騎射以勝之戰大捷明年復來瓊州拒之憤怒大掠而歸淳熙

四年占城以舟師襲真臘傳其國都慶元以來真臘大
舉伐占城以復仇殺戮殆盡俘其主其地悉歸真臘
元史占城近瓊州順風舟行一日可抵其國世祖至元
間廣南西道宣慰使馬成旺嘗請兵三千人馬三百匹
征之十五年右丞唆都以宋平遣人至占城還言其王
有內附意詔降虎符封占城郡王十九年十月朝廷以
占城國主歲遣使來朝稱臣內屬遂命左丞唆都等卽
其地立行省以撫安之既而其子負固弗服朝廷使人
往暹國往八馬兒國舟經占城皆被執故遣兵征之十
一月兵至占城港港口北連海海旁有小港五通其國
大州東南止山西旁木城官軍依海岸屯駐占城兵治
木城四面約二十餘里起樓棚立回回三稍礮百餘座
又木城西十里建行宮其酋親率重兵屯守應援行省
遣官招之七往終不服二十年正月十五日夜半發船
攻城至期分遣兵千六百人由水路攻木城三百人攻
東南沙嘴又以三千人分三道攻南面舟行至天明泊
岸爲風濤所碎者十七八賊開木城南門建旂鼓出萬
餘人乘象者數十亦分三隊迎敵矢石交下自卯至午

賊敗北官軍入木城復與東北二軍合擊之殺溺死者數千人城中餘眾數萬悉潰國主棄行宮燒倉廩殺前所留使逃入山十七日整兵攻大州十九日國主使來求降二十一日入大州二十二日遣其舅寶脫禿花及其子三十餘人奉物雜布二百匹大銀三錠小銀五十七錠碎銀一甕為質來歸款又獻金葉九節標槍詭言國主頰中箭今小愈未能見省官疑其二子非真聽其還諭國主早降且以問疾為辭遣千戶總把偕往覘之二子在途先歸子全等入山兩程國主遣人來拒不果見是日又殺前所留使百餘人二月八日寶脫禿花又至詭言其兄為今王所殺心實怨之願禽今王父子以獻請給大元服色十三日居占城唐人曾延等來言國主逃於大州西北鴉侯山聚兵三千餘并招集他郡兵未至不日將與官軍交戰懼唐人泄其事將盡殺之延等覺而逃來十五日寶脫禿花偕宰相大師等五人來降謂唐人延等為姦細國主軍皆潰散安敢復戰又言今未附州郡凡十二處每州遣一人招之舊州水路乞行省各遣一人乘舟招諭陸路則乞行省官與已往禽

國主行省猶信其言調兵一千屯半山塔遣子全德堅
等領軍百人與寶脫禿花同赴大州進討約有急則報
半山軍比至城西寶脫禿花背約間行自北門乘象遁
入山官軍獲謀者知國主實在鴉侯山立砦聚兵約二
萬餘遣使交趾真臘闍婆等國借兵及徵賓多龍舊州
等軍未至十六日官兵進攻十九日近木城二十里賊
浚濠塹拒以大木官軍斬刈超距奮擊破其二千餘眾
轉戰至木城下山林阻隘不能進賊旁出截歸路軍皆
殊死戰始得解還營二十一年三月六日唆都領軍回
十五日江淮省所遣助唆都軍萬戶忽都虎等至占城
則官軍已回適占城主遣王通事者來四月十二日國
主令其孫奉表歸款是年命平章政事阿里海牙奉鎮
南王脫歡發兵假道交趾伐占城不果行
明史占城居南海中自瓊州航海順風一晝夜可至自
福州西南行十晝夜可至卽周越裳地秦爲林邑漢爲
象林縣後漢末區連據其地始稱林邑王自晉至隋仍
之唐時或稱占不勞或稱占婆其王所居曰占城至德
後改國號曰環迄周宋遂以占城爲號朝貢不替元世

祖惡其阻命，大舉兵擊破之，亦不能定。洪武二年，遣使奉表來朝，貢帝遣官齎璽書，大統歷文綺紗羅往賜。自後或比歲貢，或間歲，或一歲再貢。洪武三年，遣使往祀其山川，尋頒科舉詔于其國。初，安南與占城構兵，天子爲遣使諭解，而安南復相侵。四年，其王奉金葉表來朝，長尺餘，廣五寸，刻本國字，乞賜兵器及樂器。樂人俾安南知我占城，乃聲教所被之地，庶不敢欺。陵帝命禮部諭之曰：占城安南，並事朝廷，同奉正朔。今兩國互構而賜占城兵器，是助爾相攻，甚非撫安之義。樂器樂人，語音殊異，難以遣發。爾國有曉華言者，其選擇以來，當令肄習，因命福建省臣勿徵其稅。洪武二十一年，真臘貢象，占城奪其四之一，其他失德事甚多。帝聞之，怒命行人董紹救責之，尋遣使謝罪。國王失道，大臣閻勝弒王自立。明年，遣太師奉表來貢，帝惡其逆，卻之。永樂元年，以卽位詔諭其國。洪武六年，貢使言海寇自稱元剽劫海上，國王擊破之，賊魁溺死，獲其舟二十艘，蘇木七萬斤，謹奉獻。帝嘉之，命給賜加等。其冬，遣使獻安南之捷。帝謂省臣曰：去年安南言占城犯境，今年占城謂安南

擾邊未審曲直可遣人往諭各罷兵息民洪武十年正月與安南王陳煊大戰煊敗死占城乘勝入其國王遣使奏朝貢人回賜物悉遭安南掠奪又畀臣冠服印章脅爲臣屬帝怒敕責安南而賜占城王鈔幣永樂四年帝方大發兵往討乃敕占城嚴兵境上遏其越軼永樂五年四月攻取安南所侵地獲賊黨獻俘闕下自後鄭和復連使其國永樂十三年王師方征陳季擴命占城助兵尚書陳洽言其王陰懷二心愆期不進反以金帛戰象資季擴季擴以黎蒼女遺之復約季擴黨侵升華府地厥罪維均帝以交趾初平不欲勞師但賜敕切責俾還侵地王卽遣使謝罪正統元年瓊州知府程瑩言占城比年一貢勞費實多乞如暹羅諸國例三年一貢帝是之然番人利中國市易雖有此例迄不遵天順八年其使者復訴安南見侵需索白象乞如永樂時遣官建立界碑以杜侵陵兵部以兩國方爭不便遣使乞令使臣歸諭國王固封疆捍外侮毋輕構禍從之成化七年二月安南兵破其國執其王劫印符大肆焚掠遂據其地王弟逃之山中遣使告難兵部言安南吞并與國

若不為處分非惟失占城歸附之心抑恐啟安南跋扈
 之志宜遣官賚敕宣諭還其國王及眷屬帝慮安南逆
 命令俟貢使至日賜敕責之成化八年遣使持節往封
 其弟至新州港守者拒之知其國已為安南所據改為
 交南州乃不敢入十年冬還成化十年安南復遣兵執
 王弟立前王孫為王以國南邊地予之成化十四年王
 孫遣使朝貢請封命給事中馮義行人張瑾往封之義
 等多攜私物既至廣東聞王孫已死其弟古來遣使乞
 封義等慮空還失利亟至占城則安南已以偽敕立其
 國人提婆台本名義等不俟奏報輒以印幣授提婆台
 封之得所賂黃金百餘兩又往滿刺加國盡貨其私物
 以歸馮義至海洋病死張瑾具其事并上偽敕于朝朝
 廷不知也明年古來奏請册印言臣國所有土地本二
 十七處四府一州二十二縣東至海南南至占臘西至黎
 人山北至阿本喇補凡三千五百餘里交人前畏天威
 還臣兄故地僅自邦都至占臘五處耳更乞特諭交人
 盡還本國禮官乃劾張瑾擅封詔下獄論死乃諭古來
 詣廣東受封并敕安南悔禍古來乃自老撾挈家赴崖

州受封命南京右都御史屠瀟往至廣東傳檄安南宣示禍福而募健卒二千人駕海舟二十艘護古來還國安南以瀟大臣奉特遣不敢與抗古來乃得入其國自殘破之後民物蕭條貢使漸稀宏治十八年古來卒其子請封廷議令其使臣賫敕往自是遂爲故事而其國貢使亦不常至其國無霜雪四時皆似夏草木常青民以漁爲業無二麥力穡者少故收穫薄檳榔終日不離口不解朔望但以月生爲初月晦爲盡不置閏分晝夜爲十更非日中不起非夜分不卧見月則飲酒歌舞爲樂無紙筆用羊皮搥薄熏黑削細竹蘸白灰爲字狀若蚯蚓有城郭甲兵人狼而狡貿易多不平戶皆北向民居悉覆茅檐高不得過三尺部領分差等門高卑亦有限人體黑男蓬頭女椎髻俱跣足玉瑣里人崇釋教歲時采生人膽入酒中與家人同飲且以浴身曰通身是膽其國人采以獻王又以洗象目每伺人于道出不意急殺之取膽以去置眾膽於器華人膽輒居上故尤貴之五六月間商人出必戒備王在位三十年則避位入深山以兄弟子姪代而已持齋受戒告於天曰我爲君

無道願虎狼食我或病死居一年無恙則復位如初國
 不甚富惟犀象最多烏木降香樵以為薪伽南香獨產
 其地一山酋長遣人守之民不得采犯者至斷手有鱉
 魚潭獄疑不決者令兩造騎牛過其旁曲者魚輒躍而
 食之直者即數往返不食也。有尸頭蠻者一名屍致魚
 本婦人惟無瞳神為異夜中與人同寢忽飛頭食人穢
 物來即復活若人知而封其頸或移之他所其婦即死
 國設厲禁有而不告者罪及一家
 海錄凡南洋海艘俱由老萬山出口西南行過七洲洋
 有七洲浮海面故名又行經陵水順東北風約四五日
 便過越南之順化界順化即越南王建都之所也又南
 行約二三日到新州又南行約三四日過龍柰又謂之
 陸柰為安南舊都由龍柰順北風日餘至本底國本底
 國在越南西南又名勘明疑即占城也國小而介于越
 南暹羅二國之間其人顏色較越南稍黑語音亦微異
 土產鉛錫象牙孔雀翡翠箭翎班魚脯又順東北風西
 行約五六日至暹羅港口。源案越南之西都在順化
 港即占城舊地也此別指本底為占城非是本底為東

埔寨卽古眞臘國海錄出于賈客舟師之口故見聞雖眞而考古多謬特附錄而辯之至占城東南瀕海尙有賓童龍國卽宋史所謂賓陀羅者與占城相連今并入廣南境內疑卽龍柰之地明王圻續通考謬指爲佛經之舍衛城辯見美洛居島國後

△含論風織景美高深員調發

孰南對內錄而維奈之漢世王世隆故考琴韻諸曲
齊章南國村宋吳祖時齊州縣清與舌結斷數令符

而面昔古以家鄉州委而籍之生古其東育便無待
龍乘利古真繼國轉難出才賈客此補大日難良

海國圖志卷七

歐羅巴人原撰

東南洋三

海岸之國

侯官林則徐譯

邵陽魏源重輯

暹羅一

安南暹羅緬甸三國幅員相接北與中國西藏雲南廣西交界少西與印度交界餘皆以海為界除麻六甲以外東西距約三千里南北距共有九十萬方里山皆發脈于印度之希馬臘壓山此山最高次則以阿山為最

餘多崎嶇難通，似每一谷可爲一國，無不廣大衍沃。暹羅建都于曼谷，兩面皆山，一寬長之大谷也。山雖層疊，均不甚高，無過五百丈者。土沃產豐，爲海舶市埠之最。附近各國皆不及前，被緬甸吞并，國人不服，且地勢阻隔，故緬甸得之旋失之，復爲暹羅所有。陸戰木柵甚堅，步步爲營，全同緬甸。國王臨朝端坐，威儀甚尊，百官偏袒跣足，屈腰蹲身，盡禮致敬，稱謂以金爲尊。如稱上則曰金首、金目、金鼻、金口、金足之類。緬甸、暹羅、安南三國大都身短色黑，面扁髑高，絕少姣好，似頑實黠，似惰實

勇髮多而黑，卻少髯鬚，有卽拔去，望若婦人。與阿細亞
洲各國不同，然性善泛愛，一見甚殷勤，稍拂輒反目，不
若印度之柔和。其居家治生，亦如中國。印度惟不及兩
國人材技藝耳。暹羅人游惰度日，不尚技藝，尤藐視外
國人有商船至其地，輒待同蠻夷，壹似無能爲役者，惟
尊中國而不知有他國也。三國皆尊奉印度佛教，凡事
苟且節儉，惟修建寺宇，則窮極華靡，塑像有雕白石者，
有鎔赤銅者，或高丈，或高二丈餘尺，金彩曜日，其工匠
不亞於歐羅巴，并有鑄像廠，其價值多寡，視像身之大

小出家爲僧終身不娶惟暹羅人或爲僧或返俗任意往還且云人生不可不出家不可久出家不出家則不知規矩久出家則虛度光陰蓋其出家猶中國子弟之出外就傅及冠有室則不復從師所習梵典梵字及術數之類皆從僧師受之實非終身披剃之比也暹羅文學亦同緬甸大抵闡揚佛教其讚頌四百似有音律須六禮拜之久始能誦畢奉佛戒禁肉食然印度僧不盡守戒或不食家牲而食野禽謂不在律禁其在家人並以蟲蛇爲美味安南緬甸亦然蓋近中國閩廣之風矣

暹羅城沿河而建，遠觀若築柵于筏，上浮水而繫諸岸，服色頗同東方，男女皆耳環手鐲，地多金鑛，凡酒盃檳榔盒器皿皆赤金，以綢緞爲質，金繡爲文，觀其服可知其職之差等，女服寬長而腋下疊褶，略同緬甸，男逸女勞，粗重工作悉委于女，貿易亦皆女爲之，然謹守禮法，雖在市中，足不踵戶，未嫁之貧女，有與外國人寓所傭工，支持家務，襄理貿易，雖儼如家室，不可干以非禮，此俗安南尤盛，治喪亦各不同，緬甸貴人棺柩停斂需時，庶人香膏塗屍而火化之，暹羅以屍飼飛禽，皆遵佛教。

茶毘之制若安南國中遇喪則慶賀燕宴十二日奢華
甲諸國彼則失之過慘此則失之太奢與其慘又甯奢
也三國皆重技藝而廟宇中雕刻彩繪尤各殫其妙官
民俱嗜觀劇或在人家或於稠眾動輒扮演價值甚廉
非若歐羅巴人必有一定之戲臺昂貴之戲價也音樂
節奏和暢動人女音嬌柔尤似中國惟意大里之音樂
三國皆不能學暹羅國東界安南北界中國南界海西
界緬甸以曼谷爲國都領部落二十有一戶口約百有
二十萬名緬甸北隅之彌南河發源雲南歷暹羅之曼

谷國都出海

南河當即雲南之瀾滄江至暹羅土名黃河水極膏沃

曼谷 國都

義唔

依彌羅

巴于含

金都扁

曼士格

持釐巴戈臘

木底阿羅

麥爾古

松波

巴爾底阿

達阿依

特那色領

松波巴

青地

波顛

西晏

戈倫比

樟底目

葉希里

加磨阿

以上原本

源案，二十一部落，名目與官書四裔考不符，姑

存備考

重輯

原無今補

皇清通考四裔門暹羅東廣南南東埔寨古暹及羅斛
兩國地也地方千里環國皆山國分郡邑縣隸於府
隸大庫司大庫司者猶華言布政司也庫司九曰暹羅

可刺細馬足曹本皮細絲束骨胎果平疋倒腦細討丕
六昆府十四曰綵納無老比采東板魯辣皮疋皮里采
野多饒千無里細辭滑采欲款細灣沾奔魁山縣七十
二西北土磽确，暹地也，東南土平衍，羅斛地也，王城分
八門，城濠磚砌，周遭十餘里，城中有小河通舟，城外西
南居民輳集，王居在城西隅，別建宮城，約周三里有奇，
殿用金裝綵繪，覆以銅瓦，室用錫瓦，堦砌用錫裹磚，欄
杆用銅裹木，王出乘金裝彩轎，或乘象車，其傘蓋以菱
葦葉爲之，王每旦登殿，官僚於臺下設氈，以次盤膝坐，

合掌於頂獻花數朵有事則具文書朗誦上呈候王可
否乃退國王自明洪武中始用中國賜印其國官制九
等一曰握亞往二曰握步喇三曰握蟒四曰握坤五曰
握悶六曰握文七曰握板八曰握郎九曰握救選舉由
鄉舉於大庫司以文達於王所王定期試之咨以民事
應對得宜始賜章服授官考課亦以三年爲期其文字
皆旁行不通漢字明正德中選留貢使一二人入館肄
業後乃稍習漢文其服色惟王留髮冠金嵌寶石形似
兜鍪上衣下裳緞布五采小袖朱履臣民皆剪髮男女

椎結白布纏頭官一等至四等金嵌寶石帽五等至九等五彩絨緞帽衣俱兩截襪履用牛皮婦人粧髻簪戒指鐺釧脂粉略同中國亦上衣下裳五彩織金花幔曳地皮舄紅黑炎熱卑溼人皆樓居上聯檳榔片籐覆之間用陶瓦無床桌几櫳皆藉氈席籐而坐官民有銀不得私用皆送王所委官傾瀉成珠用鐵印印文其上每百兩人稅六錢無印文者以私銀論罪初犯斷左指再犯斷右指三犯者死錢穀出入之事取決婦人婦多智夫聽命焉國人有名無姓爲官者稱握某民上者稱奈

某下者稱隘某風俗勁悍習水戰其貢有龍涎香速香
金銀香象牙胡椒藤黃豆蔻蘇木烏木大楓子薔薇露
西洋閃金花緞之屬又金石則有金剛鑽寶石花錫羽
毛鱗介則有孔雀五色鸚鵡犀象金絲猴六足龜花木
蔬果則有黃竹紫竹貓竹石榴子水瓜土瓜又產羅斛
香味清遠似沈香蓋以其地得名也明洪武中入朝賜
印文始稱暹羅國順治九年十二月暹羅遣使請貢并
換給印敕勘合從之自是職貢不絕康熙三年先是外
洋貢船人廣東界守臣查驗屬實進泊河干封貯所攜

貢物俟禮部文到始貿易物輒毀壞二十三年六月國王遣使來貢因疏請嗣後貢船到廣具報後卽次河干俾貨物早得貿易并請本國採買器用乞諭地方官

給照置辦貢使進京先遣貢船回國次年差船迎敕

歸國許之二十四年增賞暹羅緞幣表裏五十四十七年詔貢使所攜貨物免其徵稅六十一年詔

曰暹羅國貢使言其地米甚饒裕銀二三錢可買稻米一石朕諭令分運米三十萬石至閩廣浙江於地方甚有裨益不必收稅雍正二年貢稻種果樹其船梢目九

十六人本係漢人求免回藉許之七年 御書天南

樂國匾額賜之並減免速香安息香袈裟布疋等貢乾

隆元年六月咨禮部言往時 欽賜蟒龍大袍藏承

恩亭上 歷世久遠難保無虞懇再邀 恩賞賜

一二每年造福送寺需用銅斤求暫開禁採買部議不

可 詔特賞蟒緞四疋加賞銅八百斤後不為例八

年九月奉 旨暹羅國商人運米至閩源源而來嗣

後外洋貨船帶米萬石以上者免船貨稅銀十之五五

千石以上者免稅十之三即載米不足五千之數亦免

其船貨稅銀十分之二，次年福撫陳大受奏言，閩商前赴暹羅販米，其國木料甚賤，應聽造船運回，給照查驗，報可。十四年，御書炎服屏藩匾額賜之。十六年，閩督奏准商人赴暹羅運米，至二千石以上者，查明議敘，賞給頂帶。十八年二月入貢，并懇賜人蔘、纓、牛、良馬、象牙，并通徹規儀，內監部議不可。詔賜人蔘、四

十六年正月，暹羅國長鄭昭遣使入貢，奏稱自遭緬匪侵凌，雖復土報仇，紹裔無人，茲羣吏推昭爲長，遵例貢獻方物。五十一年，其子鄭華嗣立，復入貢。詔封華

暹羅國王其國都在廣東省西南海道約四十五晝夜
可至始自廣東香山縣登舟乘北風用午針出七洲洋
十晝夜抵安南海次有一山名外羅八晝夜抵占城海
次十二晝夜抵大崑崙島又用東北風轉舟向未及申
三分五晝夜可抵大真樹港五晝夜可抵暹羅港入港
二百里卽淡水洋又五日抵暹羅城其國西南有大山
綿亘由暹羅沿山海而南爲宋牯勝埒仔六崑大呢皆
暹羅屬國

海國聞見錄自東埔寨大山繞至西南爲暹羅由暹羅

沿山海而南爲斜仔六坤大哖丁葛奴彭亨山聯中國
生向正南至此而止又沿海繞山之背過西與彭亨隔
山而背坐爲柔佛出柔佛而西爲麻刺甲卽丁葛奴之
後山也由麻刺甲而西出於雲南天竺諸國之西南爲
小西洋戈什達暹羅沿山海而至柔佛諸國各皆有王
均屬暹羅國所轄古分暹羅二國後合爲暹羅國俗崇
佛王衣文彩佛像肉貼飛金用金爲器皿陸乘象亭象
輦舟駕龍鳳見尊貴以裸體跣足俯腰蹲踞爲禮不衣
禪而圍水幔尊敬中國用漢人爲官屬理國政掌財賦

城郭軒豁沿溪樓閣羣居水多鱷魚從海口至國城溪
 長二千四百里名黃河水深闊容洋船隨流而入通黃
 河支流夾岸大樹茂林猿猴采雀上下呼鳴番村錯落
 田疇饒廣農時闔家棹舟耕種事畢而回無俟鋤芸穀
 熟仍棹舟收穫而歸粟藁長二丈許以為入貢土物因
 播秧畢而黃河水至苗隨水以長長至六七尺則苗亦
 長至六七尺水退而稻熟矣幹河入中國勢猛而急支
 河入西域歸東埔寨暹羅以出海勢散而緩田疇藉以
 肥饒

案此竟以暹羅之河與中國之黃河同源謬甚故
 惟東西洋考謂黃水每夏秋自海中來者得之

產米之國，石可三星。俗語捕鹿，枝頭牽牛上樓，蓋鹿爲水漂沒，閣息於樹梢，溪屋爲水注浸，引牛於樓上，人被虎瞰，鱷吞者，告於番僧，僧咒拘而虎自至，咒攄綿紗於水而鱷自縛，剖而視之，形骸猶存，有受蠱者向僧求咒則解，是以俗重佛教，富者卒後葬以窆，卽釋氏塔也。又有一種共人共者，咒法名也，刀刃不能傷，王養以爲兵衛，若犯刑，令番僧以咒勸化之，使其自退，咒法方與受刑，國造巨艦，載萬餘石，求桅木於深山大樹，先以咒語告求，允許方敢下斧，不則樹出鮮血，動手者立亡，用

牛挽輦，沿途番戲以悅之。咒語以勸之，少有不順，則拔木而自回舊地，挽至厥所，其靈方息。產銀鉛錫洋布，沈速象牙，犀角，烏木，蘇木，冰片，降香，翠毛，牛角，鹿筋，籐蓆，佳文蓆，藤黃，大楓子，豆蔻，燕窩，海參，海菜，以銀豆爲幣。大者重四錢，中者一錢，次者五分，小者二分五釐，其名曰潑，皆王鑄字號，法不得剪碎零用，找以海螺巴，廈門至暹羅水程過七洲洋，見外羅山，向南見玳瑁洲，鴨洲，見崑崙，偏西見大真嶼，小真嶼，轉西北，取筆架山，向北至暹羅港，竹嶼，一百八十八更，入港又四十更，共水程

二百二十八更，而東聯東埔寨，僅水程一百十三更，何以相去甚遠，蓋東埔寨南面之海，一片盡屬爛泥，故名爛泥尾，下接大橫山、小橫山，是以外繞而途遠也。

地球圖說暹羅國東界安南國，南界麻六甲國并海，西界阿瓦國，北界中國，其百姓約三百萬，都城名萬國，城內民九萬，宗釋教，現有花旗國、英吉利國人，在此傳授耶穌聖教，居茅廬，以藤席竹簟爲寢處，不衣褲而圍小幔，裸體跣足，頭薙而留頂髮，常食檳榔，齒黑口臭，亦有建屋水上，極其高峻，國君好白象，戰則以白象爲先鋒。

現有中國廣東福建人能駕暹船與之貿易或至此務農其土人形狀與安南相似地勢低陷天雨多則遍地水溢民風男尊女賤一男多娶數女不合則休之無妨內有至大之江名湄南又麻六甲國之南有一地名新嘉坡與中國人通商之處產鹿角象牙白豆蔻胡椒各樣香料米鹽錫藤木料牛虎等皮所進入之貨大抵購自中國

地里備考曰暹羅國在亞細亞州之南北極出地八度起至二十一度三十分止經線自東九十七度起至一

百零一度止，東至安南國，西連馬拉加海峽，南接馬拉加國，北界中國雲南，長約三千三百餘里，寬約一千里，地面積方約二十萬零一千一百餘里，烟戶三兆六億口。本國地勢，西方則重岡疊嶺，絡繹延袤，此外則邱阜寥寥，平原坦闊，每遭水患，河之長者一名美能，一名薩巒，一名賣岡，湖則甚小，爲數無幾。田土膏腴，河濱沃潤，土產金、銅、鐵、錫、鉛、鹽、窩宅、燕窩、象牙、豆蔻、沈香、胡椒、烟葉、甘蔗、木料等物。地氣溼熱，風俗樸素，王位世襲，所奉之教，乃釋教也。其餘別教，人或奉之，槩不禁止，貿易興

隆商賈雲集，粵稽國史康熙二十七年，至乾隆四十六年，與緬甸國日尋干戈，時事屠戮，廢立舉行，名器更易，越三十二載，有哥羅馬甲者卽位，戰勝緬軍，國事乃定，首郡名邦哥，乃本國都也，建于美能河口，宮殿廟堂，則用磚瓦，閭閻房屋，俱用木板，其通商衝繁之地，一名西約的亞，一名廬窩，一名耶日約內，其兼攝之地，一名眞臘，卽東埔寨也，一名老搥，卽越裳也，一里哥爾，一賓德倫，一巴達尼，一加蘭丹，一的靈加諾，一給達，一仍塞倫島，或隸版圖，或派官居守，或受其貢焉。

每月統紀傳曰暹羅在南海沿古赤土及婆羅剎地也其後分爲暹與羅斛二國暹瘠土不宜耕稼羅斛土平衍而種多獲暹賴給馬元明以來皆稱國曰暹羅乾隆年間緬甸王征勦暹羅值凶年飢歲爲緬所服其後有漢人在暹國者亦乘緬甸荒年起兵報復破緬凱旋自立爲暹羅王嘉慶初年間暹國內之將軍謀反令漢王讓位現在此朝治國頻數與緬甸打仗服老撾占城馬萊西南方幾國方欲與安南相戰蓋暹羅官員殺安南公使道光年間英國駐印度之總帥與緬甸王相戰暹

海國圖元 卷一
羅與英國盟約以兵相助議息攻戰之後兩國友交本年亞默利加統邦之治主亦遣公使結貿易約暹羅之田不勝肥美其中谷之江每年漲黃水自五月一派從海口來四月插苗隨水漲而發水漸高苗亦漸長遂至六尺漲以九月始退退卽稻熟可收田得水而肥其米純白盛供所用有餘載出口產物甚多有白鮐蘇木翠羽乳香降香象牙犀角木頭能造巨艦之桅有燕窩海參海菜錫等貨其地向南甚平坦向北有山嶺土番與漢人相似而顏更黑惟好閒遊卻令外國人代

工作民居樓及竹藤之屋富者卒後葬以塔人皆裸體
跣足俯腰蹲踞見尊貴不衣褲而圍水幔惟僧言是聽
凡男子皆爲僧幾年然後爲平民建廟塔無數致敬佛
象暹羅有王三位其民皆視之如佛敬服如神仙王宮
高廣以黃金爲飾雕鏤八卦備極美麗有門三重每門
圖畫飛仙菩薩之狀懸以金花王之器皿都是黃金惟
膝行可朝見

華人駐此娶番女唐人之數多于土番惟潮州人爲官
屬封爵理國政掌財賦城郭軒豁沿溪樓閣羣居水每

年有上海甯波泉州廈門潮州廣東船進其都城稱萬國兼占地門貿易英吉利及亞黑利加各國之船皆進萬國黃河江貿易其女人亦爲商賈只恨居民懈惰多荒地若非漢人代爲耕種經營甚難度日也

外國史略曰暹羅國廣袤萬三千三百三十方里居民五百萬北極出地自五度至十九度南及同名之海隅北連老掌東及越南西連英藩屬地至緬甸北有山南方有低谷墨南河之所南流也地豐裕海島星羅棋布由中國進暹港過七洲見外羅山向南則玳瑁洲鴨洲

崑倫偏西則大真嶼小真嶼西北爲筆架山向北至暹
羅港竹嶼草木茂盛多磽地無居民古分羅國暹國後
合爲一國崇佛教惑風水王衣彩肉貼飛金用金皿陸
乘象亭象輦駕龍鳳舟設官屬曰招夸以裸體跣足俯
腰蹲踞爲禮見尊貴不衣褲用小幔圍之尊敬中國用
漢人爲官屬理國事掌財賦城郭軒朗沿溪皆樓閣多
鱷魚從海口至國城水深闊洋船隨之夾岸皆茂林深
竹猿猴彩雀上下呼鳴暹村錯落田疇沃饒粟藁長二
丈許播秧後有黃河至苗隨水長無澇傷之患水退而

稻熟矣，故其耕種之農，皆棹舟出作，無俟鋤芸，穀熟仍掉舟收穫而歸。黃水至此，其勢散而緩，田疇肥饒，人死則焚尸而後葬，或發願死後以尸飼魚鳥，將造巨艦，載萬餘石，求桅旺深山中，遇大樹，先以咒語告求，如樹神允許，方下斧，產銀鉛錫象牙犀角烏木蘇木冰片降香翠毛牛角鹿筋豆蔻燕窩海參海菜等貨。暹羅土產之豐，與旁葛拉相等，但暹羅米穀價更賤，高地亦能種麥，其木最堅美，宜于造船，且料多而價賤，較中國造船費，惟值半價，又多紅木，或運出新埠，或載廣州上海天津。

甯波等港又多種白糖胡椒每年六萬餘石亦運賣與中國其白糖十萬餘石漢船買豆蔻降香樹膏藤黃各項顏色白糖紅木烏木檀香象牙錫虎骨虎皮牛皮犀角並雜貨唐人之船亦載米糖賣與南海各島最多在新埠各海港所進中國之船每年約九十隻小船甚多俱由海南島昔有花旗船載舊鐵炮以易白糖每年約一二隻今則少矣印度國每年亦有數船到是港載布匹易白糖等貨統論漢船每年所載之貨約四萬噸外國之甲板約二萬噸向暹人無水手後有世子仿外國

甲板船亦造數隻，赴各國貿易，遂爲通商之始。山產金沙錫鐵，所出之果尤美於他國，尊貴卑賤皆築廟建塔，然無路無橋，無一肯捐建者，此其大惑也。男女居俱罕穿衣服，女露胸嬾，各剃頭，首頂留髻，男女恆浴身以遊，食甚菲薄，不殺牲破卵，惟請外國人則用之。好建寺廟，不惜費，自居則草寮，惟漢人所寓始有瓦石。庶民每月必以三分之一供徭役，不樂務本業，蓋稍得蠅頭，官吏則強奪之故耳。五爵甚多，下品覲其上品，必匍匐不得立起，民詐而驕傲，有礙難，卽失膽，不敢行動，信輪迴之

說每年有潮州福建人赴暹羅居住多取其士女現所
居者二萬餘棄漢俗衣食一如暹羅國王亦擇其聰明
者官之使理征賦貿易之事暹軍亦隨時伐鄰國虜居
民遷至本地其中緬甸文萊巫來由老掌人等甚多自
外來者各操本俗征餉甚重居民共計三百萬惜政令
太苛○暹羅本古地元時始知其名入貢中國與緬甸
文萊占臘干賓等國爲鄰時時肇衅交戰或勝或敗葡
萄亞人於萬厯間初至此國開埠貿易後英人與佛蘭
西皆至此通商方漢人未到是國以前貿易祇數萬名

英國公班衙於其地開行，有奸人賄王用事，遂招佛蘭西人。至於康熙二十五年，佛國兵士守港口，於是國人殺王，驅佛蘭西軍，更立新主，通商如故。乾隆三十八年，緬甸軍陷其都城，且火之，虜其民爲奴，全地荒蕪。漢人憤之，倡義起兵，驅敵，卽今國王之祖也。自後國復興，旺漢氓日增，貿易益廣。道光四年，緬甸與英人交戰之際，暹羅結盟於英，合陣前往，盡復前所失地。於是與英人及花旗等國大通貿易，但運出者價昂，運進者價低。今王已老，其世子聰明，親造火輪船，他國藝術無不講求。

習英語讀英書能自樹立在各國中爲無雙矣道光八年侵老掌地虜其人爲奴又前與安南屢戰屢和爲爭據占臘國暹人與越南各分占其半兩國搶奪至今未息國有五爵官憲俸祿無多不足以養其廉也國所收餉銀百五十萬兩其所居之族類各有頭目領之律例與中國相仿其經冊皆係咒語其語音亦純用梵語其字樣與華音亦有所似其書冊大半虛誕不錄緊要事唐人繙譯三國演義與暹羅人閱看所有花旗傳耶穌之教者亦藉此音以敘述之其書本頗多或闡教理或

訓藝術通國分五分。一曰暹在默南河兩岸地豐盛其都曰萬國城居民二十萬口板屋列市浮於河寺殿甚煌餘皆渺小民貧乏富者惟漢商及五爵由此更進則爲古都曰由他雅城已荒廢居民鮮少海邊又有斬地文萬巴賽等邑亦通商多產胡椒。二曰老掌所讓地在北方皆山林出紅烏木象牙等貨族類多蠻暹人所虜爲奴者也其民樸實事暹人如子事父惟產業甚微不能納貢物。三曰占臘卽甘賓地也新歸暹之版輿其土豐產而少人戶焉。四曰文萊國之數分與英之藩屬及

緬甸交界兩國山中地美而未有墾之者亦無新民遷
之者五曰巫來由種類之地其地之一分曰貴他部與
英國之檳榔嶼相對是出白饴米穀餘皆土酋歲貢于
暹

...

...

...

...

...

...

...

...

...

海國圖志卷八

東南洋

邵陽魏源撰

暹羅國

劉健庭聞錄暹羅古刺景邁三國皆與緬世仇明永歷桂王入緬時其遺臣散入各國有馬九功者爲古刺招明潰兵三千有江國泰者暹羅妻以女各遣使約李定國于孟良將犄角夾攻緬而吳三桂兵已攻永歷于阿瓦于是李定國發憤死二國之師失望而返俞燮癸巳類藁緬東爲葫蘆廣南南爲暹羅物產略同

自與中國構難以來，緬加戍東北而力戰東南，經費曠竭，百姓愁怨。四十七年，其酋孟魯殺贅角牙而自立。國人又殺孟魯，立孟雲。而值暹羅之難，暹羅國踦長居緬西南，緬於乾隆三十六年滅之。鄭昭者，中國人也。乾隆四十三年，暹羅遺民憤緬無道，推昭爲王，乘緬匪抗拒中國，人傷財盡之後，盡復舊封。又興師占緬地，贅角牙屢爲所困，暹羅於四十六年入貢，陳其事。朝廷不使亦不止也。四十七年，鄭昭死，子華嗣。華亦有武略。孟雲不能支，乃東徙居蠻得。五十一年，鄭華受朝封。孟雲懼。

五十三年由本邦齎金葉表入貢送楊重英等出

高宗哀憐之諭暹羅罷兵五十五年使賀入旬萬

壽受封爵定十年一貢嘉慶十年秋暹羅貢表又

言方出師攻緬得勝頒敕諭解之冬緬甸叩關求

入貢蓋乞救也疆吏以非貢期拒不納而緬已削弱矣

聖武記阮光平既篡黎氏據安南懼王師再討又方與

暹羅構兵恐暹羅乘其後啟關謝罪乞降又言聞暹羅

貢使將入京恐媒孽其短乞天朝勿聽其言及阮

光平受封後旋死其子阮光纘嗣立而黎氏甥農耐王

阮福映者奔暹羅暹羅妻以女弟助之兵克復農耐耐農

海錄作農奈海國聞見錄作祿賴其國在廣南之南勢在東埔寨之東北即真臘東境與廣南隔一海港

日強號舊阮屢與新阮戰奪其富春舊都并縛獻海賊

莫扶觀等于朝皆中國海賊受安南東海王偽封及

總兵偽職又獻其攻克富春時所獲阮光纘封册金印

時嘉慶四年也七年十二月阮福映全滅安南遣使入

貢乞以越南各國詔封越南國王

瀛環志略曰暹羅流寓粵人為多約居士人六之一有

由海道往者有由欽州王光十萬山穿越南境往者其

地土曠人稀田肥沃易耕穫故趨者眾然其國多蠱祟
信符咒風俗政治遠遜安南

按歐羅巴諸國自前明航海東來處處占立埔頭安南
暹羅緬甸地皆濱海豈不動其盼羨安南雖有廣南灣
之險而商船時時販鬻暹羅則內港深通乃歐羅巴皆
未嘗措意卽緬甸亦僅於海濱曠土草芻一塵是何以
故且安南雖貧物產亦夥暹羅緬甸夙稱豐饒西人概
從唾棄何也蓋西人以商賈爲本沿海埔頭專爲牟利
若處處留兵護守則得不償失南洋諸島四面環海不

相聯絡其人則巫來由番族性愚懦不知兵地形可以周覽而盡震以火炮鳥驚獸駭竄伏不敢動故西人坦然據之而不疑至安南三國毘連華夏山川修阻丁戶殷繁進戰退守與各島孤懸海中者迥別又立國皆數千百年爭地爭城詐力相尚意計所至西人不能測也留重兵則費不貲無兵則恐諸國乘其不備市舶往而埔頭不建其謂是與

魏源曰明萬曆中平秀吉破朝鮮時暹羅自請出兵潛擣日本以牽其後兵部尚書石星從之而兩廣督臣蕭

彥尼之滇撫陳用賓約暹羅夾攻緬甸緬疲于奔命遂不復內犯永歷困于緬甸暹羅復與古刺起兵攻緬以援李定國之師其忠于勝朝若是乾隆中緬甸不臣得暹羅夾攻屢捷而緬甸始貢阮光平父子篡黎氏寇沿海及暹羅助黎滅阮俘獻海盜而南洋息警其忠于

國朝又若是其國每夏有黃水自海中來以漸而漲水尺苗尺水丈苗丈水退苗熟其水將至則傾國鼓樂儀仗以迎之及秋水退亦餞之如初有播植無耘耔有天工無人力故穀豐而賤甲乎南海自康熙來歲運洋

米數十萬石以濟閩粵之民食近以免稅不利粵海關
故關吏陰撓之始則售米不許置貨繼則置貨不許免
稅于是觀望不至若不陰撓之而且推廣於天津歲歲
采買積久并可減東南之漕廣天庾之積其裨益中國
又若是宜乎 聖祖有天南樂國之褒 高宗有炎

服屏翰之額視朝鮮琉球僅著恭順無裨邊疆者何如
視西洋各夷歲叨中國茶黃磁絲之益反報以鴉片之
毒者更何如暹羅東境斗入大海廣袤數千里而滿刺
加爲海艘之都會近日並爲英夷割據又移滿刺加市

埠于柔佛故地改名新嘉坡其入寇之兵食皆恃新嘉

坡接濟暹羅軍柵堅壁同于緬甸見四洲志戰艦狹長同于

安南南齊書扶南傳專尊中國藐英夷英夷究不能患四洲志誠

使用明季夾攻日本之議令暹羅出兵恢復滿刺加柔

佛故地而安南以札船助之則英夷有內顧巢穴之憂

與驅策廓夷鄂夷攻印度之策並行不悖昔陳湯用西

域之師破康居王元策用吐番之師以擣印度皆洞地

利悉敵情又皆決機徼外不由中制用能建不世非常

之烈不然則築室盈廷亦終尼于蕭彥王疑之流而已

暹羅與南掌皆介緬甸越南之間，接壤雲南之普洱元江，其曼谷國都，則雲南瀾滄江入海之口，即古之扶南國。其東北尚有海口，曰東埔寨，即古之真臘。潮水膏沃，同之亦南洋都會，今皆不屬英吉利。

暹羅本國沿革一

唐以前為扶南國。原無今補。

晉書扶南西去林邑三千餘里，在海大灣中，其境廣袤三千里有城邑宮室，人皆醜黑，拳髮裸身，跣行，性質直不為寇盜，以耕種為務，一歲種，二歲穫，又好雕文刻鏤，食器皆以銀為之，貢賦以金銀珠香，亦有書記府庫文字，有類於胡，喪葬婚姻，略同林邑。其始女子柳葉王之為外國人，混潰所據，傳數世，其將范尋復世，王扶南，秦始初遣使貢獻，升平初復有竺旃檀稱王，遣使貢馴象，南齊書扶南傳扶南晉宋世通職貢，宋末扶南王僑陳

如遣商貨至廣州，有天竺道人那伽仙，附載欲歸國，遭風至林邑，掠其財物皆盡。那伽仙問道得達扶南，永明二年，扶南國王遣那伽仙表言，林邑王本其舊奴，竄逸聚眾，遂破林邑，自立爲王，常構凶釁，請中朝出師伐逆。臣國願助剪撲，并獻金縷龍王坐像一軀、白檀像一軀、牙塔二軀、古貝二雙、琉璃蘇釵二口、瑠瑁檳榔棹一枚。那伽仙詣京師，言其國俗事摩醯首羅天神，神常降于摩訶山，土氣恆煖，草木不落，上報以絳紫地黃碧綠紋綾各五匹，扶南人黠慧，知巧攻掠，傍邑不賓之民爲奴婢，貨易金銀絲帛，大家男子截錦爲橫幅，女爲賓頭，貧者以布自蔽，鍛金環，鏤銀食器，伐木起屋，國王居重閣，以木柵爲城，海邊生大箬葉，長八九尺，編其葉以覆屋，人民亦爲閣，居爲船，八九丈，廣裁六七尺，頭尾似魚，國王行乘象，婦人亦能乘象，鬪雞及豨爲樂，無牢獄，有訟者，則以金指環若雞子投沸湯中，令探之，又燒鎖令赤著手，上捧行七步，有罪者手皆焦爛，無罪者不傷，又令汲水，直者入，卽不沈，不直者，卽沈也，有甘蔗諸蔗、安石榴及橘多，檳榔、鳥獸如中國，人性善，不便戰，常爲林邑。

所侵擊不得與交州通故其使罕至

梁書扶南國在日南郡之南海西大灣中去日南可七

千里在林邑西南三千餘里城去海五百里有大江廣

十里西北流東入於海其國輪廣三千餘里土地洿下

而平博氣候風俗大較與林邑同出金銀銅錫沈水香

象牙孔翠五色鸚鵡其南界三千餘里有頓遜國頓遜

之外大海洲中有毗騫國去扶南八千里傳言毘騫國

頭長三尺子孫及國人死如常惟工不死其王能作

佛經相似云云語絕怪誕蓋即秦漢間蓬萊三島有與

此島平又傳扶南東界即大漲海海中有大洲洲上有

諸薄國國東有馬五洲復東行漲海千餘里至自然夫

洲出火浣布前有徼外人納女王柳葉為妻生子分圭

七邑其後王混盤況攻并之亦遣子孫中分治諸邑號

曰小王盤況年九十餘乃死國人共舉大將范蔓為主
蔓勇健有權略復以兵威攻伐旁國咸服屬之自號扶
南大王乃治作大船窮漲海攻屈都昆九椎典孫等十
餘國開地五六千里蔓遇疾死大將范尋代立更繕治
國內起觀閣遊戲之朝旦中晡三四見客民人以蕉蔗

龜鳥爲禮國法無牢獄于城溝中養鰐魚門外圈猛獸
存罪者輒以喂猛獸及鰐魚魚獸不食爲無罪三日乃
放之其後王憍陳如本天竺婆羅門也有神語曰應王
扶南憍陳如心悅南至盤盤扶南人聞之舉國欣戴迎
而立焉復改制度用天竺法憍陳如死後王持梨隋跋
摩宋文帝時奉表獻方物天監二年跋摩復遣使送珊
瑚佛像并獻方物大同五年又言其國有佛髮長一丈
二尺詔遣沙門釋雲寶隨使往迎之其國人醜黑拳髮
所居不穿井數十家共一池引汲之俗事天神天神以
銅爲像二面者四手四面者八手手各有所持或小兒
或鳥獸或日月其王出入乘象嬪侍亦然王坐則偏踞
翹膝垂左膝至地以白氈敷前設金盆香鑪于其上國
俗居喪則剃除鬚髮死者有四葬水葬則投之江流火
葬則焚爲灰燼土葬則瘞埋之鳥葬則棄之中野人性
貪恠無禮義男女恣其奔隨

隋書赤土國扶南之別種也在南海中水行百餘日而
達所都土色多赤因爲號東波羅刺國西波羅婆國
南訶羅旦國北拒大海地方數千里其王姓瞿曇氏不

知有國近遠稱其父釋王位出家爲道傳位于子嗣位
十六年矣有三妻並鄰國王之女也居僧祇城有門三
重相去各百許步每門圖畫飛禽僊人菩薩之像懸金
花鈴珥婦女數十人或奏樂或捧金花又飾四婦人容
飾如佛塔邊金剛力士之狀夾門而立門外者持兵仗
門內者執白拂夾道垂素網綴花王宮諸屋悉是重閣
北戶北面而坐其俗敬佛尤重婆羅門冬夏常溫雨多
霽少種楠無時特宜稻稌白豆黑麻其餘物產多同於
交趾以甘蔗椰漿爲酒煬帝卽位募能通絕域者大業
三年屯田主事常駿虞部主事王君政等請行齋物五
千段以賜赤土王其年十月駿等自南海郡乘舟晝夜
二旬每值便風至焦石山而過東南泊陵迦鉢拔多洲
西與林邑相對上有神祠焉又南行至師子石自見鳥
嶼連接又行二三日西望見狼牙須國之山於是南達
雞籠島至于赤土之界其王遣婆羅門鳩摩羅以舩三
十艘來迎吹豳擊鼓進金鑊以纜駿船月餘至其都王
遣其子以禮見先遣人送金盤貯香花金合貯香油金
甌貯香水白疊布四條以供使者盥洗其日未時又將

象二頭持孔雀蓋以迎使人并致金花金盤以藉詔函
至王宮駿等奉詔書上閣王以下皆跪宣詔訖引駿等
坐奏天竺樂事畢還館又遣婆羅門就館送食以草葉
爲盤其大方丈後數日請人宴儀衛導從如初見之禮
禮遺甚厚尋遣子貢方物並獻金芙蓉冠龍腦香以鑄
金爲多羅葉隱起成文以爲表金函封之令婆羅門以
香花奏蠡鼓而送之既入海見綠魚羣飛水上浮海十
餘日至林邑東南並山而行其海水闊千餘步色黃氣
腥舟行一日不絕云是大魚糞也循海北岸達于交趾
新唐書扶南在日本之南七千里地卑窪與環王同俗
有城郭宮室王姓古龍居重觀柵城楛葉以覆屋王出
乘象其人黑身鬖髮裸行俗不爲寇盜田一歲種三歲
穫國出金剛狀類紫石英生水底石上汲水取之可以
刻玉扣以殺角乃泮人喜鬪雞以金珠香爲稅治特牧
城俄爲真臘所并益南徙那弗那城武德貞觀時再入
朝又獻白頭人二白頭者直扶南西人皆素首膚理如
脂居山穴四面峭絕人莫得至與參半國接
水經注竺芝扶南記曰扶南去林邑四千水步道通檀

和之令軍入邑浦據船官口城六里者也自船官下注大浦之東湖大水連行湖上西流湖水日夜長七八尺從此以西朔望並潮一上七日水長丈六尺七日之後日夜分爲再潮水長一二丈春夏秋冬釐然一定高下定度水無盈縮是曰海運亦曰象水也又兼象浦之名晉功臣表所謂金遼清逕象渚澄源者也其川浦渚有水蟲彌微攢木食船數十日船壞源潭湛瀨有鮮魚色黑身五丈頭如馬首何人入水便來爲害

元史暹國當成宗元貞元年進金字表暹人與麻里孛兒舊相讐殺至是皆歸順

明史暹羅在占城西南順風十晝夜可至卽隋唐赤土國後分爲羅斛暹二國暹土瘠不宜稼羅斛地平行種多穰暹仰給焉元時暹常入貢其後羅斛強併有暹地遂稱暹羅斛國洪武三年命使臣呂宗俊等齎詔諭其國四年其王遣使貢馴象六足龜及方物詔賜大統歷及綵幣洪武五年貢黑熊白猴及方物明年復來貢其王之姊別遣使進金葉表貢方物於中宮凡再卻之時其王懦而不武國人推其伯父主國事遣使來告貢方

物且獻本國地圖，洪武七年來貢，言去年舟次烏猪洋，遭風壞舟，飄至海南，賴官司救護，尚存飄餘兜羅錦、降香、蘇木諸物，進獻廣東省臣，以聞。帝怪其無表，既言覆舟，而方物乃有存者，疑其爲番商，命卻之。諭中書及禮部臣曰：古諸侯於天子，比年一小聘，三年一大聘，九州之外，則每世一朝，所貢方物，表誠敬而已。唯高麗頗知禮義，故令三年一貢。他遠國如占城、安南、西洋、瑣里、瓜哇、浮泥、三佛齊、暹羅、斛真、臘諸國，入貢旣頻，勞費太甚，今不必復爾。其移牒諸國，俾知之。然而來者不止。其世子亦遣使上箋於皇太子，貢方物，命引其使朝東宮，宴賚。遣之。洪武八年，其舊明臺王世子亦遣使奉表朝貢。宴賚如王使。洪武十年，世子承其父命來朝，上喜，賜以暹羅國王之印，自是其國遵朝命，始稱暹羅。而比年一貢，或一年兩貢。至正統後，乃或數年一貢云。洪武二十年，溫州民有市其沈香諸物者，所司坐以通番，當棄市。帝曰：溫州乃暹羅必經之地，因其往來而市之，非通番也。乃獲宥。洪武二十八年，世子遣使朝貢，且告其父之喪，命中官趙達等往祭，敕世子嗣王位。諭之曰：朕自卽

位以來，命使出疆，周于四維，足履其境者三十六，聲通于耳者三十二。風殊俗異，大國十有八，小國百四十九。較之于今，暹羅最近。邇者使至，知爾先王已逝，王紹先王之緒，有道于邦，家臣民歡懌，茲特遣人錫命，王其罔失法度，罔淫于樂，以光前烈，欽哉。永樂二年九月，有番船飄至福建海岸，詰之，乃暹羅與琉球通好者。所司籍其貨以聞，帝曰：「二國修好，乃甚美事，不幸遭風，豈可以爲利，所司其治舟給粟，俟風便遣赴琉球，是月其王貢方物，乞賜烈女傳，請頒量衡爲國永式，從之。先是占城貢使返，風飄其舟至彭亨，暹羅羈留不遣，蘇門答刺及滿刺加又訶暹羅奪所賜印誥，帝降敕責之。六年中宮鄭和使其國，其王貢方物謝罪，永樂七年正月，奸民何入觀等逃入暹羅，帝命使者還告其主，毋納逋逃。其王卽奉命送還，賜敕幣獎之。永樂十七年，責暹羅侵滿刺加，王遣使謝罪，宣德八年，其國貢舟次占城，新州港盡爲其國人所掠，正統元年，貢使來京訴狀，敕占城王令盡還所掠人物，已而占城移咨禮部，言本國前歲遣使往須文達那，亦爲暹羅賊人掠去，必暹羅先還所掠。

本國自不敢不還。成化十七年，貢使還至中途，竊買子女且多載私鹽，命遣官戒諭。先是汀州人謝文彬以販鹽下海，飄入其國，仕至坤岳，猶天朝學士也。後充使來朝，因貿易禁物事覺，下吏宏治十年，以四夷館無暹羅譯字官，詔廣東訪取能通彼國言語文字者，赴京備用。正德四年，暹羅船有飄至廣東者，市舶中官熊宣與守臣議稅其物供軍需，事聞，詔斥宣妄攬專柄，撤還南京。十年，進金葉表朝貢，館中無識其字者，詔選留其使二人入館肄習。嘉靖元年，暹羅占城貨船至廣東，市舶中官牛榮縱家人私市，論死如律。三十二年，遣使貢白象及方物，白象死于途，其使者以珠寶飾其牙，盛以金盤，并獻白象尾毛爲信。帝嘉其意，厚遣之。隆慶中，其鄰國東蠻牛求婚不得，齎牲綈，劄陳慙怒，大發兵攻破其國。王自經，虜其世子以歸。次子嗣位，勵志復仇。萬厯間，東蠻牛兵復至，王整兵奮擊，大破之。暹羅由是雄海上，移兵攻破真臘，降其王。從此歲歲用兵，遂霸諸國。萬厯三十年，日本破朝鮮，暹羅請潛師直擣日本，牽其後中樞石星議從之。兩廣督臣蕭彥持不可，乃已。迨崇禎

十六年三月猶入貢其國周千里風俗勁悍習于水戰大將用聖鐵裹身刀矢不能入聖鐵者人腦骨也王瑣里人官分十等自王至庶民有事皆決于其婦其婦人志量實出男子上婦私華人則夫置酒同飲恬不爲怪曰我婦美爲華人所悅也崇信釋教男女多爲僧尼亦居庵寺持齋受戒衣服頗類中國富貴者尤敬佛百金之產卽施其半氣候或寒或熱地卑溼人皆樓居男女椎髻以白布裹首富貴者死用水銀灌其口而葬之貧者則移置海濱聽羣鳥飛啄謂之鳥葬交易用海貝是年不用貳則國必大疫其貢物有象象牙犀角孔雀毛翠羽龜及六足龜寶石珊瑚片腦米腦糠腦腦油腦柴薔薇水碗石丁香阿魏紫梗藤竭藤黃硫黃沒藥烏爹香安息香羅斛香速香檀香黃熟香降真香乳香樹香木香丁香烏香胡椒蘇木肉豆蔻白豆蔻華茛烏木大楓子及撒哈刺西洋諸布其國有三寶廟祀中官鄭和瀛涯勝覽暹羅地方千里環國皆山峭拔崎嶇地下溼氣候不常或嵐或熱自占城西南舟行七晝夜方至新門海口入港方達其國王居宮室壯麗民樓居其樓密

聯檳榔片藤繫之甚固藉以藤蓆竹簟寢處於中王乃
瑣里人也白布纏首無衣腰束嵌絲繫加以綿綺壓腰
跨象行或肩輿金柄傘蓋芟葦葉爲之尚釋教國人皆
然僧尼甚多其服類中國言語與廣東同俗澆浮習水
戰常征伐鄰邦市用海貳一如錢價厥產紅馬肯的石
次于紅雅忽明瑩如石榴子國西北二百餘里有市鎮
曰上水通安南各種番貨俱有
明黃衷海語曰暹羅國在南海中自東莞之南亭門放
洋南至烏豬獨豬七洲星盤坤未針至外羅坤申針四
十五程至占城舊港經大佛靈山其上峰墩則交趾屬
也又未針至崑崙山又坤未針至玳瑁洲玳瑁及於龜
山西鍼入暹羅港水中長洲隱隆如坭船出入如中國
車坭然其國之一控扼也少進爲一關少以夷酋又少
進爲二關卽國都也其地沮洳無城郭王居據大嶼稍
如中國殿宇之制覆以錫板闢東壁爲巨扉是爲王門
治內分十二塘坭酋長主焉猶華之有衙門也其要害
爲龜山爲陸昆猛齋猶華言總兵甲兵屬焉有奶街爲
華人流寓者之居土夷乃散處水柵板閣蔭以芟草無

陶瓦也其國右僧謂王前世皆僧僧來世作王其貴僧亦稱僧王國有號令決焉凡國人謁王必合掌跪而撫王足者三自撫其首者三謂之頂禮凡王子始長習梵字梵禮若術數之類皆從貴僧故貴僧之權侔于王國無姓氏華人流寓者始從本姓一再傳亦亡矣人皆髡首恥爲竊盜其監獄則穴地爲重樓三級謂之天牢輕罪置上級差重置中級殊死者置下級其輕刑以皮鞭差重斷足十指差重斷手十指罪至殊死者腰斬或以象蹂之貴僧爲請于王王乃宥之沒爲僧奴謂之奴囚賦役省薄惟給象爲最重故殊死獲免者不爲奴囚則以給象終身焉國無占候凡日薄蝕國人見者則奔告于王首至者賞建寅之月王乃命巫占方命力者由勝方所向掠人而剔其膽雜諸藥爲湯王濡足象濡首以作猛氣凡用膽華人爲上僧不剔孕婦不剔瘡疔不剔是故用膽視歲甲子爲多寡也建辰之月是爲歲首建巳之月始作農事建午之月潦始漲建酉之月潦退王乃御龍舟乃祀土穀禾乃登始穫凡稼之長茂視潦之淺深稈長丈有三尺穠八尺有咫稻長盈寸田畝贍數

口少歉歲也婦女多慧巧刺繡織衽工於中國尤善醞釀故暹酒甲於諸夷婦飾必以諸香澤其體髮日夕三四浴戲狎不禁雖王之妻妾皆盛飾倚市與漢兒相貿易不訝亦不敢亂居父母若夫之喪則削髮如比丘尼經旬乃蓄鬢如舊凡死喪富者火尸而葬貧者舉尸筏而浮諸海喪屬跪伏海濱迎僧而咒羣大鳥啄食頃刻而盡謂之鳥葬凡有鰐患則奔赴於王王詔貴僧咒飯而投諸鰐所乃以貝多葉書數符佩以奴囚沒水牽數鰐出貴僧稽其孽跡多者戮之劓其腹有得鉛珠二升者跡少乃黥符其背咒而縱之國人凡有仇怨皆謁僧求咒其咒土夷遭者非死卽病然不能驗于華人也凡餓僧少具十品食麥襦杭牛羊豕鵝鴨雞魚皆熟而薦之僧咒而後舉舉必盡數器不足十品不以供其產多蘇方木檳榔椰子波羅蜜片腦諸香雜菓象齒犀角金寶珠璫之屬貿易用賤故其民饒富豪酋各劇別島而居奴囚數百口蓄貲每鉅萬不蓋藏不虞寇西洋諸國異產奇貨輻輳其地匠藝工緻嵌寶指環時至中國一枚值數千金地廣兵強嘗併有占臘本賦南而私其貢

賦以不繫中國利害置不問也

謝清高海錄曰暹羅國在東埔寨之西縱橫數千里西
北與緬甸接壤國大而民富庶船由港口入內河西行
至國都約千餘里夾岸林木葱蘢田疇互錯時有樓臺
下臨水際猿鳥號鳴相續不絕男女俱上裸男以幅布
圍下體女則被裙官長衣製與中國雨衣略同以色辨
貴賤紅者為上右臂俱刺文王則衣文彩繡佛像其上
飛金貼身首器皆以金陸乘象輦水乘龍舟凡下見上
偏袒跣足屈腰蹲身國無城郭民皆板屋王則瓦覆其
上臨水為之土人多力農時至則播種熟則收穫無事
耜鋤故稱樂土商賈多中國人其釀酒販鴉片煙開場
聚賭三者推稅甚重俗尊佛教每日早飯寺僧被袈裟
沿門托鉢家家必以精飯肴蔬合掌拜獻僧回寺奉佛
外又三分之僧食其一鳥雀食其一以其一飼蟲鼠終
歲如是僧無自舉火者出家為僧謂之學禮雖富貴家
子弟亦多為之弱冠後聽其還俗其婚嫁俱至僧寺拜
佛然後歸合盃焉頗重中國文字客有能詩文者國王
多羅致之而供其飲食國有軍旅則取民為兵一月之

內其糗糧皆兵白備越月然後王家頒發四鄰小國多屬焉土產金銀鐵錫魚翅海參鮫魚瑤瑁白糖落花生檳榔胡椒荳蔻砂仁木蘭椰子速香沈香降香枷楠香象牙犀角孔雀翡翠象熊鹿水鹿山馬水鹿形似鹿而無角色青其大者如牛山馬形似鹿而大商賈常取其角假充鹿茸犀角有二種色黑而大者爲鼠角價賤極大者重二三斤小者亦重斤餘其色稍白而旁有一潤直上者爲天曹角其潤直上至頂者亦不貴若頂上二三分無潤而圓滿色潤而微者則貴矣椰木如椶直幹無枝其大合抱高者五六丈種七八年然後結子每歲止開花四枝花莖傍葉而生長數尺花極細碎一枝止結椰子數顆四花分四季采之欲釀酒者則於花莖長盡花未及開時用蕉葉裹其莖勿令花開再以繩密束之砍莖末數寸取瓦罐承之其液滴于罐中每日清晨及午酉亥三時則收其液清晨所收味清酣日出後則微酸俱微有酒味再釀之則成酒矣所砍處稍乾則又削之花莖盡而止椰肉可以榨油壳可爲器衣可爲船纜故番人多種之歲以土物貢中國

暹羅屬國沿革二

今東埔寨古真臘。原無今補。

隋書真臘國在林邑西南本扶南之屬國也去日南郡
 舟行六十日而至南接車渠國西有朱江國其王姓刹
 利氏自其祖漸已強盛遂兼扶南而有之居伊奢那城
 郭下二萬家城中有一大堂是王聽政之所總大城三
 十城有數千家各有部帥官名與林邑同其王三日一
 聽朝坐五香七寶床上施寶帳其帳以文木為竿象牙
 金鈿為壁狀如小屋懸金光焰有同于赤土前有金香
 鑪二人侍側王着朝霞古具縵絡腰腹下垂至脛頭戴
 金寶花冠被真珠瓔珞足履革屣耳懸金璫常服白氎
 以象牙為屨若露髮則不加瓔珞臣人服製大抵相類
 有五大臣一曰孤落支二曰相高憑三曰婆何多陵四
 曰舍摩陵五曰髯多婁階庭門閣侍衛有千餘人被甲
 持仗其國與參半朱江二國和親數與林邑陀洹二國
 戰爭其人行止皆持甲仗若有征伐因而用之其俗非
 王正妻子不得為嗣王初立之日所有兄弟并刑殘之
 或去一指或劓其鼻別處供給不得仕進人形小而色

黑婦人亦有白者悉奉髮垂耳性氣捷勁居處器物頗類赤土以右手爲淨以左手爲穢每旦澡洗以楊枝淨齒誦經咒其國北多山阜南有水澤地氣尤熱無雪霜饒瘴癘毒蟲土宜稻粱少黍粟果菜與日南九真相類異者有婆那婆樹毘野樹婆田羅樹歌畢佗樹其餘多同九真近都有陵伽鉢袞山上有神祠每以兵五千人守衛之城東有神名婆多利祭用人肉其王年別殺人以夜祀禱亦有守衛者千人其敬鬼如此多奉佛法尤信道士佛及道士并立像於館大業十三年遣使貢獻帝禮之甚厚其後亦絕

唐書真臘一曰吉蔑本扶南屬國去京師二萬七百里東距車渠西屬驃南瀕海北與道明接東北抵驩州其王刹利氏貞觀初并扶南有其地戶皆東向坐上東客至屑檳榔龍腦香蛤以進不飲酒惟與妻飲房中避尊屬有戰象五千良者飼以肉世與參半驃通好與環王乾陀洹數相攻自武德至聖歷凡四來朝神龍後分爲二半北多山阜號陸真臘半南際海饒陂澤號水真臘水真臘地八百里王居婆羅提拔城陸真臘或曰文單

曰婆鏤地七百里王號筮屈開元天寶時王子率其屬
二十六來朝拜果毅都尉大厯中副王婆鏤及妻來朝
獻馴象十一擢婆鏤試殿中監賜名賓漢是時德宗初
即位珍禽奇獸悉縱之蠻夷所獻馴象畜苑中元會充
庭實者凡三十二悉放荆山之陽元和中水真臘亦遣

使入貢

宋史真臘國亦名占臘其國在占城之南東際海西接
蒲甘南抵加羅希其縣鎮風俗同占城地方七千餘里
有銅臺列銅塔二十有四銅象八以鎮其上象各重四
千斤其國有戰象幾二十萬馬多而小政和宣和皆來

朝貢封其王與占城等

明史真臘在占城南順風三晝夜可至隋唐及宋皆朝

貢宋慶元中滅占城而并其地因改國名曰占臘元時

仍稱真臘洪武三年八月遣使臣郭徵等賚詔撫諭其

國四年其國巴山王使使進表貢洪武十六年遣使賚

勘合文冊賜其王凡中國使至而勘合不符者即屬矯

偽許繫縛以聞復賜織金文綺三十二磁器萬九千其

王即使使來貢洪武十九年復遣行人劉敏唐敬偕中

官賞磁器往賜洪武二十年唐敬等還其王使使貢象
五十九匹香六萬斤尋遣使賜其王鍍金銀印永樂中
屢入貢使者以其國數被占城侵擾久留不去帝遣中
官送之還并敕占城王罷兵修好景泰後不常至其國
城墮周七十餘里幅員廣數千里國中有金塔金橋殿
宇三十餘所王歲時一會羅列玉猿孔雀白象犀牛於
前名曰百塔洲盛食以金盤金椀故有富貴真臘之諺
民俗富饒天時常熱不識霜雪禾一歲數稔男女椎髻
穿短衫圍梢布刑有剝刑刺刑盜則去手足番人殺唐
人罪死唐人殺番人則罰金無金則鬻身贖罪唐人者
諸番呼華人之稱也凡海外諸國盡然文字以麋鹿雜
皮染黑用粉爲小條畫於上永不脫落以十月爲歲首
閏悉用九月夜分四更亦有曉天文者能算日月薄蝕
其地謂儒爲班詰僧爲苾姑道爲八思由班詰入仕者
爲華貫先時項掛一白綫以自別既貴曳白如故俗尙
釋教僧皆食魚肉或以供佛惟不飲酒其國自稱甘孛
智後訛爲甘破蔗萬曆後又改爲東埔寨其國自呼甘孛智後
東西洋考東埔寨卽古真臘國也

東南洋 海岸國四

左

訛為澈浦只，今云東埔寨者，又澈浦只之訛也。先為扶
 南屬國王，姓刹利氏，至質斯多那，兼扶南而有之。遂雄
 諸夷。隋大業十三年，遣使貢獻。帝禮之甚厚。至唐曠土
 寢闕，神龍以來，國分為二。北多山阜，號陸真臘。南近海
 號水真臘。久之仍合為一。今賈舶所至，大都水真臘地
 也。宋時屢入貢，建炎間其國屢與占城戰，失利。至建元
 時，大興復仇，破占城，遂王其地，改國號占臘。於是地方
 七千餘里，元之置省占城也。嘗遣虎符金牌，同往真臘
 為所拘執。元貞中始招諭賓服之，明興職貢不絕。今賈
 舶未有到王城者，只到海隅，一屬國耳。故不見其靡靡
 或云即蒲甘也。按宋史蒲甘入貢，朝議欲待以交趾之
 禮，乃本朝貢夷獨無蒲甘，應是為真臘所并無疑矣。
 源案蒲甘即今港口夷，一作龍奈。
 皇清通考四裔門東埔寨在西南海中，海岸多石，名關
 泥尾北枕大山，國中無城池，王即山而建府，架竹木為
 之，覆以茅葉，民居亦然。其尤近海濱者，潮汐至則屋為
 之浮而上，沈而下。天時暖而不寒，常若春夏衣，不以鎗
 扣披于其身，若尸解者。下則圍以裙，名曰水幔，首蓄髮

蒙以花帕自王至於國人無異制惟貴者始得服綢緞
國人皆布以是為等差人柔弱喜飼象教之操演禦敵
飲食咸用手搏以漁獵耕種為業帶劍入山尋犀角獻
尊長以為禮父母喪則薙髮以黑色為居喪之服土產
蘇木象牙白豆蔻膝黃麋皮檳榔子黃蠟每冬春間浙
閩粵商人往彼互市近則兼市絲筋及夏秋乃歸粵人
之歸也舟必經七洲大洋到魯萬山由虎門入計程七
千二百里距廈門水程一百七十更國王名辣王丹女
之子篡之不知其姓名安南暹羅屬國也其旁有尹代
嗎國距廈門水程一百四十更亦屬安南暹羅風俗略
與港口東埔寨同

海國聞見錄曰廣南沿海至占城祿賴繞西而至東

埔寨廈門至占城水程一百更至東埔寨水程一百一

十三更東埔寨雖另自一國介在廣暹二國之間東貢

廣南西貢暹羅稍有一遜水陸各得並進而征之番係

白頭無來由多裸體以布幅圍下身名曰水幔地產鉛

錫象牙翠毛孔雀洋布蘇木降香沈速諸香燕窩海菜

藤○案海錄祿賴作龍柰東埔寨作本底國

皇清通考四裔門港口國瀕西南海中安南暹羅屬國也王鄭姓今王名天賜其沿革世次不可考國中多崇山所轄地纔數百里有城以木為之宮室與中國無異自王居以下皆用磚瓦服物制度彷彿前代王蓄髮戴網巾紗帽身衣蟒袍腰圍角帶以鞞為履民衣長領廣袖有喪皆衣白平居以雜色為之其地常暖雖秋冬亦不寒人多裸而以裳圍其下相見以合掌拱上為禮重文學好詩書國中建有孔子廟漢人流寓其地有能句讀曉文義者則延以為師子弟皆彬彬如也土產海參魚乾蝦米牛脯雍正七年後通市不絕經七洲大洋到魯萬山由虎門入口達廣東界計程七千二百里距廈門水程一百六十更○源案港口地方與東埔寨相連非海島也亦真臘舊境疑即宋史所謂蒲甘國而阮王福映之農耐舊國一作龍柰者也通考修于乾隆末而阮福映借暹兵克復安南則在嘉慶初云元周達觀真臘風土記真臘國或稱占臘其國自稱曰甘孛智今我元按西番經名其國曰澈浦只蓋亦甘孛智之近音也自溫州開洋行丁未針厯聞廣海外諸州

港口過七州洋經交阻洋到占城又自占城順風可半
月到真蒲乃其境也又自真蒲行坤申針過崑崙洋入
港港凡數十惟第四港可入其餘悉以沙淺故不通巨
舟然彌望皆修藤古木黃沙白葦倉卒未易辨認故舟
大以尋港爲難自港口北行順水可半月抵其地曰查
南乃其屬郡也又自查南換小舟順水可十餘日過半
路村佛村渡淡洋可抵其地曰干傍取城五十里按諸
番志稱其地廣七千里其國北抵占城半月路西南距
暹羅半月程南距番禺十日程其東則大海也舊爲通
商往來之國本朝峻都元帥之置省占城也嘗遣一虎
符百戶一金牌千戶同到本國竟爲拘執不返元貞乙
未遣使招諭以次年二月離明州二十日自溫州港口
開洋三月十五日抵占城中途逆風不順七日始至大
德丁酉六月回舟八月十二日抵四明

又曰天時耕種歲可三四熟蓋四時常如夏不識霜雪
也其地半年有雨半年無雨自四月至九月每日午後
必雨淡水洋中水痕漸高至七八丈巨樹盡沒惟留一
杪人家濱水而居者皆移入山至十月後點雨絕無洋

中僅可通小舟，深處不過三五尺，人家又復移下矣。耕種者計何時稻熟，是時水可渰至何處，隨其地而播種之。又有一等下田不種，常生水高至一丈，而稻亦與之俱高。凡稻田蔬圃皆不用糞，唐人到彼皆不與言及中國糞壅之事，恐爲所鄙也。

又曰山川自入數真蒲以來，平林夾岸，長江巨港，綿亘百里，古樹修藤，禽聲雜遝，至半港始見曠田，則又絕無寸水，彌望禾黍芄芄而巳。野牛千百成羣，游聚其間，又有竹坡亦綿亘數百里，其間竹節相間生刺，筍味至苦，四畔皆有高山。

又曰屬郡九十餘，曰真蒲，曰查南，曰巴澗，曰莫良，曰八薛，曰蒲買，曰雉棍，曰木津波，曰賴敢坑，曰八廝里，其餘不能悉記，各置官屬，皆以木柵爲城。

又曰每一村或有寺，或有塔，人家稍密，自有鎮守之官，大路旁亦有郵亭之類，近與暹人交兵，遂皆荒曠。

又曰風俗前此有八月取膽之俗，因占城王每年索人膽一囊，千萬餘枚，遇夜則多方令人於城中及村落取之，俟數足以饋占城王，近年已除此惡俗。

又曰國人交易播婦人所以唐人到彼必先納一婦以
司貿易瀕海山野之人炎日蒸炙面黧首黔至王宮貴
室之婦女不親風日仍瑩潔如玉惟女甫及七八九歲
卽必延僧先開其童身十一二卽嫁先天不完故甫及
二十卽如四十歲人其俗小兒入學者皆先就僧家教
習暨長而還俗其教莫能考也

又曰地苦炎熱每日非數次澡浴則不可耐久夜亦不
免一二次初無浴室益匱但每家各有一池否則兩三
家合一池不分男女皆裸浴其間惟父母尊長與子女
卑幼先後尙相迴避如行輩則無拘也城外大河無日
無之水常溫如湯惟五更則微涼至日出則復溫矣唐
人之爲水手者利其國中不著衣裳且米糧易給婦女
易得屋室易辨器用易足貿販易獲利往往逋留不返
又曰軍卒亦多裸跣右執標鎗左執戰牌無弓箭礮石
甲冑傳聞與暹人相攻皆驅百姓使戰別無謀畫
又曰國王乃故國主之婿原以典兵爲職使女竊其金
劍遂據其國身嵌聖鐵刀箭不能傷恃此出游無忌凡
出時諸軍馬擁其前旗幟鼓樂踵其後宮女三五五花

布花髻手執巨燭自成一隊雖白日亦照燭又有宮女
 皆執內中金銀器皿及文飾之具制度迥別不知何用
 又有宮女執標鎗標牌為內兵又成一隊又有羊車馬
 車皆金飾之臣僚國戚皆騎象在前遠望紅涼傘不計
 其數又其次則國王之妻及妾媵或轎或車或馬或象
 其銷金涼傘何止百餘其後則是國主立于象上手持
 寶劍象牙亦以金飾之張銷金白涼傘凡二十餘柄其
 傘柄皆金為之其四圍擁簇之象甚多又有軍馬護之
 若遊近處止用金轎皆以宮女舁之大凡出入必奉小
 金塔金佛在其前觀者皆跪地頂禮國王日兩次坐衙
 治事凡臣民欲見國王者皆先列坐地上以俟少頃內
 中隱隱有樂聲在外方吹螺以迎之須臾見二宮女纖
 手捲簾而國主乃仗劍立于金窗之中矣臣僚以下皆
 合掌叩頭螺聲方絕王坐獅子皮聽事既畢尋即入內
 二宮女復垂其簾
 諸人各起散矣